

穀玉類編

卷二十一至  
卷二十四

AE  
4  
W 284  
V. 5



EAST ASIAN LIBRARY  
RM. 3049 ROBARTS LIBRARY  
UNIVERSITY OF TORONTO  
TORONTO, CANADA M5S 1A5







卷二十一

休休先生集

右篇三

人

口

知

知

知

知

知

知

知

知

知

知

知

知

知

知

知

知

知

知

知

知

知

知

知

知

知

知

知

知

知

知

知

知

知

知







穀玉類編卷二十一

休寧 汪兆舒果齋輯

才品類三

知人

壯志

才能

改過

強記

辭命

高隱

夙慧

知人

郭林宗性明知人。獎拔士人。皆如所鑒識。張孝仲芻牧之中。知范特祖。郵置之役。召公子。許偉康。並出屠沽。司馬子威。拔自卒伍。及同郡郭長信等六十人。並以成名。後漢書

許邵好人倫。多所賞識。若樊子昭。和陽士者。並顯名於世。天下言



拔士者稱許郭邵與從兄靖好共覈論鄉黨人物每月輒更其品題故汝南俗有月旦評

李元禮一世龍門時聶季寶小家子不敢見元禮杜周甫知季寶賢不能定名以語元禮元禮呼見一與言卽決曰此人當作國士後卒如元禮言世說

何點有人倫鑒多所甄拔知吳興邱遲於幼童稱濟陽江淹於寒素悉如其言南史

裴行儉善知人在吏部時見蘇味道王勣謂曰二君後皆掌銓衡李敬元盛稱王勃楊炯盧照隣駱賓王之才引示行儉行儉曰士之致遠先器識後文藝勃等雖有才而浮躁銜露豈享爵祿者哉



炯頗沉默。可至令長餘皆不得其死。

唐書

呂蒙正爲相。富言者蒙正客也。一日白曰。見子十許歲。欲令入書院事。廷評太祝蒙正許之。及見。驚曰。此兒他日名位與吾相似。而勲業遠過於吾。令與諸子同學。供給甚厚。言之子卽弼也。後弼兩入相。亦以司徒致仕。其知人類如此。

宋史

李沆爲相。寇準以丁謂才薦於沆。沆不用。準問之。沆曰。顧其爲人。可使之在人上乎。準曰。如謂者。相公終能抑之。使在人下乎。沆笑曰。他日後悔。當思吾言。準後爲謂所傾。始伏沆。

呂誨爲御史中丞。王安石執政。時多謂得人。誨獨言其不通時事。大用之。則非所宜。上疏劾安石。神宗方注倚安石。出誨知鄧州。誨



之將有言也。司馬光止之。誨曰：「安石雖有時名，然好執偏見，輕信姦回，置諸宰輔，天下必受其禍。此腹心之疾，救之恐不逮。」顧可緩耶？誨既斥，安石益橫。光由是服誨之先見。

汪立信之未仕也，家窶甚。會歲祲，吳淵守鎮江，爲粥以食流民，使其客黃應炎主之。應炎一見立信，與語知其非常人，言於淵。淵大奇之。禮以上客，凡供帳服御，視應炎爲有加。應炎甚怏怏。淵曰：「此君，吾地位人也。君非其倫，盍少下之。」立信明年登第，其後踐歷畧如淵，而卒死於難。人謂淵能知人。

揭傒斯早有文名，大德間遊湘漢。湖南帥趙淇雅號知人，見之驚曰：「他日翰苑名流也。」元史



成祖嘗書廷臣名。命解縉各疏其短長。以付太子。太子因問尹昌隆。王汝玉。縉對曰。昌隆君子。而量不弘。汝玉文翰不易得。惜有求心耳。後仁宗卽位。出縉所疏。示楊士奇。曰。人言縉狂。觀所論。列皆有定見。不狂也。明史

胡儼初爲湖廣考官。得楊溥文。大異之。題其上曰。必能爲董子之正言。而不爲公孫弘之阿曲。世以爲知人。

楊士奇雅善知人。好推轂寒士。所薦達有初。未識面者。而于謙周忱。况鍾之屬。皆用士奇薦。居官至一二十年。廉能冠天下。爲世名臣云。

楊繼宗嘗監鄉試。得二卷。具朝服再拜曰。二子當大魁天下。吾爲



朝廷得人賀耳及拆卷王華李旻也後果相繼爲狀元人服其鑑  
才能

朱博爲冀州刺史行部吏民數百人遮道自言從事請且畱此縣  
錄見諸自言者欲以觀試博博心知之告外趣駕使從事勅告吏  
民欲言縣丞尉者刺史不察黃綬各詣郡欲言二千石墨綬長吏  
者使者行部還詣治所其民爲吏所寃及言盜賊辭訟事各使屬  
其部從事博駐車決遣四五百人皆罷去如神吏民大驚不意博  
應事變乃至於此

漢書

劉輿爲東海王越長史越旣總錄以輿爲上佐賓客滿筵文案盈  
几遠近書記日有數千輿終日不倦命議如流酬對款備人服其



能比之陳遵時稱劉興長才

晉書

劉穆之爲尚書左僕射內總朝政外供軍旅決斷如流事無壅滯賓客輻輳求訴百端內外諮稟盈階滿室穆之日覽詞訟手答牋書耳行聽受口並酬應不相參涉皆悉瞻舉

宋書

裴琰之爲同州司戶參軍年甚少不主曹務刺史李崇義內輕之吏白積案數百崇義讓使趣斷琰之曰何至逼人乃命吏連紙進筆爲省決一日畢旣與奪當理而詞筆勁妙崇義驚曰子何自晦成吾過耶由是名動一州號霹靂手

唐書

晉桑維翰秉政一制指揮節度使十五人無敢違者時軍國多事咨請輻輳維翰隨事裁決初若不經思慮及退而熟議之亦終不



能易也通鑑

錢勰知開封府。吏畏其敏。欲困以事。導人訴牒至七百。勰隨卽剖決。簡不中理者。緘而識之。戒無復來。閱月聽訟。一人又至。呼詰之。其人曰。無有。勰曰。汝前訴云云。吾識以某字。啟緘示之。信然。上下皆驚咤。後復知開封。臨事益精。蘇軾乘其據案時。遺之詩。勰操筆立就。以報。軾曰。電掃庭訟。響答詩筒。近所未見。宋史

開濟爲刑部尚書。敏慧有才辨。凡國家經制。田賦獄訟。工役河渠。事衆莫能裁定。濟一算畫。卽有條理。品式可爲法守。以故太祖甚信任。數備顧問。兼預他部事。明史

夏原吉進尚書。成祖北征。輔太孫畱守北京。總行在九卿事。時諸



司草創。每旦原吉入佐太孫參決庶務。朝退。諸曹郎御史環請事。原吉口答手書。不動聲色。北達行在南。啟監國京師。肅然。

于謙以兵部侍郎遷本部尚書。郕王方攝朝廷。臣請族誅王振而振黨馬順者。輒叱言官。於是給事中王竑廷擊順。衆隨之。朝班大亂。衛卒聲洶洶。王懼欲起。謙排衆直前掖王止。且啟王。宜諭曰。順等罪當死。勿論。衆乃定。謙袍袖爲之盡裂。退出左掖門。吏部尚書王直執謙手歎曰。國家正賴公耳。今日雖百王直何能爲。

### 強記

應奉自童兒及長。凡所經履莫不暗記。讀書五行並下。爲郡決曹。史行部四十二縣。錄囚徒數百千人。及還。太守問之。奉以說罪繫。



姓名坐狀輕重無所遺脫時人奇之

後漢書

禰衡有才辨章陵太守黃射嘗與衡游共讀蔡邕所作碑文射愛其辭還恨不繕寫衡曰吾雖一覽猶能識之惟其中石缺二字爲不明耳因書出之射馳使寫碑還校如衡所書莫不歎服

王粲與人共行讀道邊碑人問曰卿能闇誦乎曰能因使背而誦之不失一字觀人圍碁局壞粲爲覆之碁者不信以帊蓋局使更以他局爲之用相比校不誤一道其強記默識如此

魏志

陸陞所讀書一遍必誦於口嘗借人漢書失五行志四卷乃暗寫還之畧無遺脫

梁書

韓顯宗有才學沙門法撫三齊稱其聰悟嘗與顯宗校試鈔百餘



人名各讀一遍。隨即覆呼法。撫猶有一二舛謬。顯宗了無誤錯。魏書

邢邵聰明強記經史五行俱下一覽便記無所遺忘。嘗與陽固等

至王昕舍宿飲。相與賦詩。凡數十首。皆在主人奴處。旦日奴行。諸

人求詩不得。邵皆爲誦之。諸人有不認詩者。奴還得本。不誤一字。

北齊書

虞世南爲秘書監。太宗命寫列女傳於屏風。於時無本。世南暗疏

之無一字謬。唐書

李邕見特進李嶠。自言讀書未徧。願一見秘書。嶠曰。秘閣萬卷。豈

時日能習耶。邕固請。乃假直秘書。未幾辭去。嶠驚。試問奧篇隱帙

了。辨如響。嶠歎曰。子且名家。



蕭穎士觀書一覽卽誦嘗與李華陸據遊洛龍門讀路旁碑穎士卽誦華再閱據三乃能盡記聞者謂三人才高下此其分也

崔涓性開敏爲杭州刺史受署未盡識卒史乃以紙各署姓名傳襟上過前一閱後數百人呼指無誤

張方平穎悟絕倫從人假三史旬日卽歸之曰吾已得其詳矣凡書皆一閱不再讀宋綬蔡齊以爲天下奇才及知開封府府事叢集前尹率書板識之方平獨默記決遣無少差忘

宋史

何涉汎覽博古一過目終身不忘人問書傳中事必指卷第冊葉所在驗之果然

吳萊天資絕人凡書一經目輒成誦嘗往族父家日易漢書一帙



以去族父追扣之萊琅然而誦不遺一字三易他編皆如之元史  
許有壬讀書一目五行嘗閱衡州淨居院碑文近千言一覽輒背  
誦無遺

周忱巡撫江南性機警錢穀鉅萬一屈指無遺算嘗陰爲冊記陰  
晴風雨或言某日江中遇風失米忱言是日江中無風其人驚服  
有奸民故亂其舊案嘗之忱曰汝以某時就我決事我爲汝斷敢  
相給耶明史

王瓊爲人有心計善鉤校爲尚書益明習國計邊帥請芻糗則屈  
指計某倉某場庠糧草幾何諸郡歲輸邊卒歲採秋青幾何曰足  
矣重索妄也人益以瓊爲和



王行幼隨父依賣藥徐翁家。媼好聽稗官小說。行日記數本爲媼誦之。媼喜言於翁。授以論語。明日悉成誦。翁大異之。俾盡讀家所有書。遂淹貫經史百家言。未弱冠謝去。

王世貞生有異稟。書過目終身不忘。

### 高隱

園公綺里季夏黃公角里先生。此四人者。當秦之世。避入商雒深山。高祖召之。不至。其後谷口有鄭子真。蜀有嚴君平。皆修身自保。非其服弗服。非其食弗食。大將軍王鳳以禮聘子真。子真不訕。君平卜筮於成都。李疆爲益州牧。致禮與相見。卒不敢言以爲從事。近古之逸民也。

漢書



嚴光會稽人。少有高名。與光武同遊學。及光武卽位。光變名姓。披羊裘釣澤中。帝疑其光。備安車。元纁聘之。三反而後至。車駕幸其館。光臥不起。帝引光入。論道舊故。因共偃臥。光以足加帝腹上。明日。太史奏客星犯御坐。除爲諫議大夫。不屈。乃耕於富春山。後人名其釣處爲嚴陵瀨焉。後漢書

姜肱彭城人。與豫章徐穉俱徵不至。桓帝乃下彭城。使畫工圖其形狀。肱臥於幽闇。以被韜面。言感眩疾。不欲出風。工竟不得見之。龐公居峴山之南。夫妻相敬如賓。荊州刺史劉表往候之。因釋耕於隴上。而妻子耘於前。表曰。先生不肯官祿。後世何以遺子孫乎。龐公曰。世人皆遺之以危。今獨遺之以安。未爲無所遺也。表歎息。



而去後攜其妻子登鹿門山采藥不反

周續之閒居讀老易入廬山時劉遺民遁迹廬山陶淵明亦不應徵命謂之尋陽三隱

宋書

臧榮緒隱居教授自號被褐先生與關康之俱隱在京口世號爲

二隱

南齊書

何胤廬江人二兄求點並棲遁求先卒至是胤又隱世號點爲大

山胤爲小山兄弟發迹雖異克終偕隱世謂何氏三高

南史

劉訐孝友篤至刺史辟爲主簿訐挂檄於樹而逃阮孝緒隱居不交當世訐經一造孝緒卽願以神交訐族兄歆又履高操三人目夕招攜都下謂之三隱族祖孝標與書稱之曰訐超超俗如牛



天朱霞歆矯矯出塵如雲中白鶴皆儉歲之梁稷寒年之織纈  
田游巖京兆人母及妻皆有方外志與共棲遲山水間游巖入箕  
山居許由祠旁自號由東鄰頻召不出高宗幸嵩山親至其門游  
巖野服出拜帝曰先生比佳否答曰臣所謂泉石膏肓烟霞癩疾  
唐書

林逋恬淡好古結廬西湖之孤山二十年足不及城市薛映李及  
在杭州每造其廬清談終日嘗自爲墓於其廬側臨終爲詩有茂  
陵他日求遺藁猶喜曾無封禪書之句宋史

趙質隱居燕城南教授爲業明昌間章宗遊春水過焉聞絃誦聲  
幸其齋舍見壁間所題詩諷詠久之賞其志趣不凡召至行殿命



之官固辭曰臣僻性野逸志在長林豐草金鑣玉絡非所願也况聖明在上可不容巢由爲外臣乎

金史

竇默隱於大名與姚樞許衡朝暮講習至忘寢食繼還肥鄉以經術教授世祖在潛邸遣召之默變名姓以自晦

元史

倪瓚無錫人家雄於貲所居有閣曰清閟幽迥絕塵藏書數千卷皆手自勘定古鼎法書名琴奇畫陳列左右四時卉木縈繞其外高木修篁蔚然深秀故自號雲林居士至正初海內無事忽散其貲給親故人咸怪之未幾兵興富家悉被禍而瓚扁舟箬笠往來震澤三泖間獨不罹患張士誠累欲鉤致之逃漁舟以免及吳平

瓚年老矣黃冠野服混迹編氓洪武七年卒年七十四

明史



孫一元不知何許人。嘗棲太白之巔。故號太白山人。風儀秀朗。蹤跡奇譎。烏巾白袷。攜鐵笛鶴瓢。徧遊中原。抵吳越。所至賦詩談神仙。論當世事。往往傾其座人。鉛山費宏罷相。訪之杭州南屏山。值其晝寢。就臥內與語。送之及門。了不酬答。出語人曰。吾一生未嘗見此人。與長興吳琬等偕隱苕溪。遂終焉。

沈周長洲人。郡守欲以賢良薦。周筮易得遯之九五。遂決意隱遯。所居有水竹亭館之勝。圖書鼎彝。充牣錯列。四方名士。過從無虛日。風流文采。照映一時。奉親至孝。父歿。或勸之仕。對曰。若不知母氏。以我爲命耶。居恒厭入城市。於郭外置行窩。有事一造之。晚年匿跡。惟恐不深。先後巡撫王恕。彭禮咸禮敬之。欲畱幕下。並以老



母辭母年九十九而終周亦八十矣

夙慧

甘羅年十二秦始皇召見使於趙說趙王割五城攻燕得上谷三十城令秦有十一羅還報秦封羅爲上卿

史記

吾家之童烏九齡而與我元文

揚子法言

張霸年數歲而知孝讓鄉人號爲張曾子七歲通春秋欲進餘經父母曰汝小未能也霸曰我饒爲之故字曰伯饒

後漢書

杜安年十三入太學號奇童京師貴戚慕其名或遺之書安不發悉壁藏之及捕案貴戚賓客安開壁出書印封如故竟不離其處任延年十二明詩易春秋顯名太學學中號爲任聖童



黃香九歲失母。思慕憔悴。殆不免喪。年十二。博學經典。能文章。京師號曰天下無雙江夏黃童。

孔融年四歲。與諸兄食梨。輒引小者。人問其故。答曰。我小兒法當

取小者。

孔融家傳

愍懷太子遹幼聰慧。宮中嘗夜失火。武帝登樓望之。太子時年五歲。牽帝裾入闈中。帝問其故。曰。暮夜倉卒。宜備非常。不宜令照見人。君帝由是奇之。

晉書

元帝長子紹幼聰哲。帝嘗坐置膝前。屬長安使來。因問曰。日與長安孰遠。對曰。長安近。不聞人從日邊來也。帝異之。明日宴羣僚。又問之。對曰。日近。帝失色。曰。何乃異間者之言乎。對曰。舉目見日。不



見長安帝益奇之

陸雲六歲能屬文。吳尚書閔鴻見而奇之。曰：「此兒若非龍駒，當是鳳雛。」

鳳雛

范雲年六歲，就其姑夫袁叔明讀毛詩。日誦九紙。南史

祖瑩年十二，好學，以晝繼夜。父母恐其成疾，禁之。瑩密於灰中藏

火，父母寢睡之後，燃火讀書。內外親屬呼爲聖小兒。魏書

楊惛六歲學史書。十一受詩易。好左氏春秋。學庭前有柰樹，寔落

地，羣兒爭之。惛頽然獨坐。其從兄昱特相器重，謂人曰：「此兒駒齒

未落，已是我家龍文。」更十歲後，當求之千里外。北齊書

李百藥七歲能屬文。父友陸父等讀徐陵文，有刈琅邪之稻之語。



歎不得其事。百藥進曰：「春秋郕子藉稻杜預謂在琅邪客大驚號奇童。」  
唐書

李泌七歲知爲文。元宗召能言佛道孔子者相答難禁中有員倣者九歲升坐詞辨注射坐人皆屈。帝異之曰：「半千孫固當然。」因問童子豈有類若者。倣奏臣舅子李泌。帝卽召之。泌至。帝方與張說觀奕。因使說試其能。說請賦。方圓動靜。泌曰：「願聞其畧。」說曰：「方若棋局。圓若棋子。動若棋生。靜若棋死。泌卽答曰：「方若行義。圓若用智。動若騁才。靜若得意。」說因賀。帝得奇童。

劉晏曹州人。元宗封泰山。晏始八歲獻頌行在。帝奇其幼。令張說試之。說曰：「國瑞也。」卽授太子正字。公卿邀請旁午。號神童。



段秀寔年六歲母病不食飲至七日病間乃肯食時號孝童

李賀七歲能辭章韓愈皇甫湜始聞未信過其家使賀賦詩援筆輒就如素構自目曰高軒過二人大驚

楊億初生能言母以小經口授隨卽成誦七歲能屬文年十一太宗聞其名詔江南轉運使就試詞藝送闕下連三日得對試詩賦五篇下筆立成太宗深加賞異卽授秘書省正字

宋史

司馬光生七歲凜然如成人聞講左氏春秋愛之退爲家人講卽了其大旨自是手不釋書羣兒戲於庭一見登甕足跌沒水中衆皆棄去光持石擊甕破之水迸兒得活

陳埧大父叔平與樓鑰友善叔平死鑰哭之埧纔四歲出揖如成



人鑰指盤中銀杏使屬對。填應聲曰：金桃問何所據對以杜詩鸚鵡啄金桃。鑰悚然曰：亡友不死矣。

劉因天資絕人。三歲識書。日記千言。六歲能詩。七歲能屬文。落筆驚人。元史

吳澄生三歲。穎悟日發。教之古詩。隨口成誦。五歲日受千餘言。夜讀書。至旦。母憂其過勤。節膏火。澄候母寢。燃火復誦習。

何喬新年十一。侍父京邸。修撰周旋過之。喬新方讀通鑑。續編旋問曰：書法何如綱目？對曰：呂文煥降元不書叛。張世傑溺海不書死。節曹彬包拯之卒不書其官。而紀義軒多採怪妄。似未有當也。旋大驚異。明史



劉渾八歲賦溝水詩時目爲聖童

李東陽四歲能作徑尺書景帝召試之甚喜抱置膝上賜果鈔後  
兩召講尚書大義稱旨命入京學

王鏊年十六隨父讀書國子監諸生爭傳誦其文侍郎葉盛提學  
陳選奇之稱爲天下士

壯志

陳涉少時與人庸耕曰苟富貴無相忘庸者笑曰若爲庸耕何富  
貴也涉太息曰燕雀安知鴻鵠之志哉

史記

韓信雖爲布衣時其志與衆異其母死貧無以葬然乃行營高敞  
地令其旁可置萬家



終軍從濟南步入關。關吏予繻曰：「還當以合符。」軍曰：「大丈夫西游，終不復傳還。」繻而去。及軍爲謁者，使行郡國，建節東出關。關吏識之，曰：「此使者乃前棄繻生也。」漢書

司馬相如初西去，題昇仙橋柱曰：「不乘高車駟馬，不過此橋。」及爲中郎將，使西夷，果以傳車至其所。成都記

郭丹從師長安，買符入函谷關，乃慨然歎曰：「丹不乘使者車，終不出關。」更始二年，丹爲諫議大夫，持節使南陽，安集受降。果乘高車出關，如其志焉。後漢書

班超家貧，爲官傭書，以供養。嘗投筆歎曰：「大丈夫無他志，畧猶當效傅介子、張騫立功異域，以取封侯，安能久事筆研間乎？」左右皆



笑之超曰小子安知壯士志哉

王濬恢廓有大志嘗起宅開門前路廣數十步曰吾欲使容長戟  
幡旗衆咸笑之濬曰陳勝有言燕雀安知鴻鵠之志後以平吳功

封襄陽縣侯拜撫軍大將軍

晉書

宗慤少時叔父炳問其志慤曰願乘長風破萬里浪後以功封洮

陽侯豫州刺史

宋書

桑維翰初舉進士主司惡其姓以爲桑喪同音人有勸其從他求  
仕者維翰慨然著日出扶桑賦以見志又鑄鐵硯曰硯敝則改而  
他仕卒以進士及第

五代史

羅洪先舉進士第一授修撰卽請告歸外舅太僕卿曾直喜曰幸



吾壻成大名。洪先曰：儒者事業有大於此者。此三年一人安足喜也。

明史

豐熙幼有異稟。嘗大書壁間曰：立志當以聖人爲的。遜第一等事於人。非夫也。舉殿試第二。孝宗奇其策。賜第一人袍帶。寵之累遷。右諭德。以不附劉瑾。出掌南京翰林院事。世宗卽位。大禮議起。熙數力爭。受杖遣戍。

### 改過

楚遠子馮爲令尹。有寵者八人。皆無祿而多馬。他日朝。與申叔豫言。弗應而退。從之入於人中。又從之。遂歸。退朝見之。曰：子三困我於朝。吾過。子姑告我。對曰：昔觀起有寵於子南。子南得罪。觀起車



裂何故不懼自御而歸不能當道至謂八人曰吾見申叔所謂生  
死而肉骨也辭八人者而後王安之左傳

賈淑性險害郭林宗遭母憂淑來弔既而孫威直亦至以林宗受  
惡人弔不進而去林宗追而謝之曰賈子厚誠凶德然洗心向善  
仲尼不逆互鄉故吾許其進也淑聞之改過自厲終成善士後漢書

周處少孤縱情肆慾州曲患之處乃慨然有改勵之志謂父老曰  
今時和歲豐何苦而不樂父老歎曰三害未除南山白額猛獸長  
橋下蛟并子爲三矣處曰若此爲患吾能除之乃入山射殺猛獸  
投水殺蛟入吳從陸雲學志存義烈言必忠信克已期年州府交

辟晉書



戴若思少好游俠。不拘操行。遇陸機赴洛。船裝甚盛。若思與其徒掠之。指麾同旅。皆得其宜。機見之。知非常人。遙謂曰。卿才器如此。乃復作劫耶。若思感悟。投劍就之。機與定交。若思砥節立行。仕至征西將軍。

齊高帝故吏竺景秀。以過繫作部。帝謂荀伯玉卿比看景秀。不答曰。數往候之。備加責誚。云若許某自新。必吞刀刮腸。飲灰洗胃。帝善其答。釋之。卒爲忠信士。南史

薛惟吉少縱酒不謹。與伶人游。其父居正卒。太宗親臨。居正妻拜於喪所。上因問不肖子安在。頗改行否。恐不能負荷先業。奈何。惟吉伏喪側。懼赧不敢起。自是盡革故態。謝絕所與游者。居喪有禮。



上知其改行令知澶州

宋史

吳海虛懷樂善有規過者欣然立改因顏其齋曰聞過

明史

王思志行邁流俗高陵呂枏亟稱之嘗曰聞過而喜似季路欲寡未能似伯玉則改齋其人也改齋者思別號也

李東陽事父有孝行初官翰林時常飲酒至夜深父不就寢忍寒待其歸自此終身不夜飲於外

黃淳耀弱冠卽著自監錄知過錄有志聖賢之學後爲日曆畫之所爲夜必書之凡語言得失念慮純雜無不備識用自省改晚而充養和粹造詣益深

辭命



哀帝問鄭尚書卿門何以如市對曰臣門如市臣心如水世說

郭淮奉使賀文帝踐阼而道路得疾稽留及羣臣歡會帝正色責之曰昔禹會諸侯防風後至便行大戮今普天同慶而卿最遲何也淮曰臣聞五帝先教導民以德夏后政衰始用刑辟今臣遭唐虞之世是以知免於防風之誅帝悅魏志

魏平原王叡母被誅故未建爲嗣魏主丕與叡獵見子母鹿命叡射其子叡泣曰陛下已殺其母臣不忍復殺其子丕爲之惻然遂立爲太子

天旱禁酒釀者刑吏索得釀具欲令與作酒者同罰簡雍從先主遊見一男子行道雍曰彼有淫具與欲釀者同先主大笑而原欲



釀者蜀志

蜀李密聘吳。吳主與羣臣汎論道義。謂寧爲人弟。密曰。願爲人兄。吳主曰。何也。密曰。爲兄供養之。即長。吳主及羣臣稱善。華陽國志

或問華譚曰。諺言人之相去。如九牛一毛。有此理乎。譚曰。昔許由巢父。讓天子之貴。今市道小人。爭半錢之利。此之相去。何啻九牛一毛也。聞者稱善。晉書

顧琛爲尚書庫部郎。到彥之經畧江南大敗。委棄兵甲。武庫爲之空。後太祖宴會。有荒外歸化人在坐。上問琛。庫中仗猶有幾許。琛詭答有十萬人仗。舊武庫仗秘不言多少。上旣問。追悔失言。及琛詭對。甚喜。宋書



齊王儉領吏部客有姓譚者詣儉求官儉曰齊桓滅譚那得有君  
答曰譚子奔莒所以有僕儉賞其善據卒得職焉

南史

謝莊有口辨孝武賜莊寶劍莊以與魯爽後爽叛帝因宴問劍所  
在答曰昔以與魯爽別竊爲陛下杜郵之賜上悅

魏徵爲侍中文德皇后旣葬太宗作層觀以望昭陵引徵同升徵  
熟視曰臣眊昏不能見帝指示之徵曰臣以爲陛下望獻陵若昭  
陵臣固見之帝泣爲毀觀

唐書

王方慶爲相時子爲眉州司士參軍武后曰君在相位何子之遠  
對曰廬陵是陛下愛子今尚在遠臣之子庸敢相近以比倉唐悟  
文侯事雖造次不忘悟君於善



近侍有欲罷科舉者。上曰。吾見太師議之。張浩入見。上曰。自古帝王有不用文學者乎。浩對曰。有。曰。誰歟。浩曰。秦始皇上顧左右曰。豈可使我爲始皇乎。事遂寢。金史

胡濙爲尚書。時王文惡林聰。文致其罪。欲殺之。濙不肯署。遂稱疾。數日不朝。景帝使興安問疾。對曰。老臣本無疾。聞欲殺林聰。殊驚悸耳。聰由是得釋。明史

初英宗命所司爲石亨營第。旣成。壯麗逾制。帝登翔鳳樓見之。問誰所居。恭順侯吳瑾對曰。此必王府。帝曰。非也。瑾曰。非王府誰敢僭踰若此。帝領之。

陳以勤充裕王講官。進洗馬。時東宮位號未定。羣小多構釁。世宗



於父子素薄。王歲時不得燕見。嚴世蕃一日屏人語以勤及高拱。曰。聞殿下近有惑志。謂家大人何拱。故爲謔語。以勤正色曰。國本默定久矣。生而命名。從后從土。首出九域。此君意也。故事。諸王講官止用檢討。今兼用編修。獨異他邸。此相意也。殿下每謂首輔社稷臣。君安從受此言。世蕃默然去。裕邸乃安。



穀玉類編卷二十一



穀玉類編卷二十二

休寧 汪兆舒果齋輯

經濟類一

歷象

用人

稅法

備荒

理財

錢法

禮制

歷象

黃帝命容成作蓋天以象周天之形。通鑑

帝堯命羲和欽若昊天。歷象日月星辰。敬授人時。帝舜在璿璣玉

衡以齊七政。書經

張平子作銅渾天儀於密室中。以漏水轉之。令伺之者閉戶而唱



之其伺之者以告靈臺之觀天者曰璇璣所加某星始見某星已中某星今沒皆如合符也。晉書

宋高祖克長安得古銅渾儀儀狀雖舉不綴七曜至文帝元嘉中詔太史令錢樂之更鑄渾儀徑六尺八分以水轉之昏明中星與天相應。通鑑

顓頊以南正司天陶唐則分命和仲湯武革命正朔斯改秦兼天下以十月爲正漢初猶行秦歷至孝武改用夏正時有古歷六家班固採以爲志光武中興未能詳考逮永平之末乃改行四分當塗受命亦有史官江左兩晉迭有增損宋氏元嘉何承天造歷迄於齊末相仍用之梁天監中改行宋祖沖之甲子元歷陳武受禪



亦無創改。後齊文宣用宋景業歷。西魏入關。行李業興歷。周大象初。太史馬顯上丙寅元歷。便卽行用。迄隋開皇四年。乃改用張賓歷。十七年。行張胄元歷。胄元學於祖沖之。傳其師法。自茲厥後。尅食頗中。隋書

貞觀初。太史李淳風上言。渾儀推驗七曜。並循赤道。蓋渾儀無黃道久矣。太宗異其說。因詔爲之。儀成。帝稱善。置於凝輝閣。用之測候。閣在禁中。其後遂亡。開元九年。梁令瓚奏爲黃道游儀。元宗嘉之。又詔一行與令瓚等更鑄渾天銅儀。唐書

唐二百九十餘年。而歷八改。曰戊寅。曰麟德甲子。曰開元大衍。曰寶應五紀。曰建中正元。曰元和觀象。曰長慶宣明。曰景福崇元。高



祖受禪。詔傅仁均等參議合受命歲。名爲戊寅歷。高宗時。戊寅歷疎。李淳風作歷。起麟德二年。謂之麟德歷。因劉焯皇極歷法增損所宜。當時以爲密。元宗開元九年。歷著日蝕比不效。詔僧一行作大衍歷。自太初至麟德。歷有二十家。與天雖近而未密也。至一行密矣。其倚數立法。固無以易也。後世雖有改作者。皆依倣而已。至肅宗時。韓穎造至德歷。代宗時。郭獻之造五紀歷。德宗時。徐承嗣造正元歷。憲宗卽位。徐昂上觀象歷。穆宗立。改撰歷名曰宣明。昭宗時。歷數漸差。詔邊岡等治歷成。名崇元。頒用至唐終。

王朴通律歷之法。周世宗詔朴校定大歷。乃設通經統三法。以歲軌離交朔望周變率策之數。步日月五星。爲欽天歷。

五代史



顯德欽天歷。宋初用之。建隆二年。以推驗稍疎。詔王處訥等造新歷。歷成。賜名應天。未幾。氣候漸差。太平興國四年。行乾元歷。未幾。氣候又差。繼作者曰儀天。曰崇天。曰明天。曰奉元。曰觀天。曰紀元。迨靖康丙午而八改歷。南渡之後。曰統元。曰乾道。曰淳熙。曰會元。曰統天。曰開禧。曰會天。曰成天。至德祐丙子。復八改歷。宋史

元祐中。蘇頌請製渾儀。因命頌提舉。頌既邃於律歷。以韓公廉曉算術。奏用之。授以古法。爲臺三層。上設渾儀。中設渾象。下設司辰。貫以一機。激水轉輪。不假人力。時至刻臨。則司辰出告星辰躔度所次。占候測驗。不差晷刻。晝夜晦明。皆可推見。前此未有也。

元初承用金大明歷。至世祖至元十三年。平宋。遂詔許衡。王恂。郭



守敬。改治新歷。乃與南北日官參考累代歷法。復測候日月星辰消息運行之變。參別同異。酌取中數。以爲歷本。歷成。賜名曰授時歷。自古及今。推驗之精。蓋未有出於此者。元史

明之大統歷。寔卽元之授時。成化以後。交食往往不驗。議改歷者紛紛。如華湘。周濂。李之藻。邢雲路之倫。頗有所見。鄭世子載堉。撰律歷融通。進聖壽萬年歷。其說本之南都御史何瑋。深得授時之意。而能補其不逮。臺官泥於舊聞。當事憚於改作。並格而不行。崇禎中。議用西洋新法。命閣臣徐光啟。光祿卿李天經。先後董其事。成歷書一百三十餘卷。多發古人所未發。時布衣魏文魁上疏排之。詔立兩局推驗。累年校測。新法獨密。然亦未及頒行。明史



用人

衛出公問孔子曰。寡人之任臣。一一自觀察之。猶復失人。何故。答曰。此卽所以失之也。人旣難知。非觀察所盡。昔者舜臣堯。官木任士。堯一從之。左右曰。八君當自任耳目。而取信於人。無乃不可。堯曰。吾之舉舜。已耳目之矣。今舜所舉人。吾又耳目之。是耳目人終無已也。君苟付可。付則已。不勞而賢。才不失矣。孔叢子

左雄拜尚書令。上疏曰。寧人之務。莫重用賢。用賢之道。必存考黜。昔宣帝以爲吏。數變易。則下不安業。久於其事。則民服教化。其有政理者。輒以璽書勉勵。增秩賜金。是以吏稱其職。人安其業。今典城百里。轉動無常。各懷一切。莫慮長久。臣以爲守相長吏。惠和有



顯效者可就增秩勿使移徙順帝感其言下有司詳所施行

後漢書

唐高宗時魏元同爲吏部侍郎上言曰人君之體當委任而責成功所委者當則所用者自精周穆王命伯冏爲太僕正曰慎簡乃僚是使羣司各自求其小者而天子命其大者也漢氏得人皆自州縣補署五府辟召然後升於天朝魏晉以來始專委選部夫以天下之大士人之衆而委之數人之手用刀筆以量才按簿書而察行借使平明猶照有所窮况所委非人而有愚闇阿私之弊乎願畧依周漢之規以救晉魏之失疏奏不納

通鑑

李絳爲中書舍人憲宗怪前世任賢以致治今無賢可任何耶對曰聖王選當代之人極其才分自可致治天子不以已能蓋人痛



折節下士。則天下賢者乃出。帝曰。何知其必賢而任之。對曰。知人誠難。然循其名。驗以事。所得十七。夫任官而辨廉措事。不阿容。無希望依違之辭。無邪媚愉悅之容。此近於賢矣。賢則當任。任則當久。賢者中立而寡助。舉其類。則不肖者怨。杜邪徑。則懷奸者疾。一制度。則貴戚毀傷。正過失。則人主疏忌。夫然。用賢豈易哉。帝曰。卿言得之。唐書

神宗憫貢舉之弊。議更法。王安石謂古之取士。本於學。請興學校。以復古。其明經諸科。欲廢罷。蘇軾上言曰。得人之道。在於知人。知人之法。在於責寔。使君相有知人之明。朝廷有責寔之效。雖用今之法。臣以爲有餘。或曰。鄉舉德行而畧文章。或曰。專取策論而罷



詩賦或欲舉唐故事采譽望而罷彌封或欲變經生帖墨而考大義此數者皆非也夫欲興德行在君人者修身以格物審好惡以表俗若設科立名以取之則是教天下以僞自文章言之策論爲有用詩賦爲無益自政事言之則詩賦論策均爲無用然自祖宗以來莫之廢者以爲設法取士不過如此也帝讀軾疏曰吾固疑此得軾議釋然矣

宋史

門下侍郎劉摯奏事論人才曰人才難得能否不一性忠寔而才識有餘上也才識不逮而忠寔有餘次也有才而難保可藉以集事又其次也懷邪觀望隨時勢改變此小人也終不可用哲宗曰卿常能如此用人國家何憂



蘇轍爲御史中丞。自元祐一新庶政。至是五年矣。惟元豐舊黨起。邪說以搖撼在位。宰相呂大防劉摯患之。欲稍引用以平夙怨。謂之調停。宣仁后疑不決。轍面斥其非。復上疏曰。親君子遠小人。則主尊國安。未聞以小人。在外憂其不悅。而引之於內。以自遺患也。且君子小人。勢同冰炭。同處必爭。一爭小人必勝。前者用事之臣。二聖宥之於外。蓋已厚矣。而議者惑於說。欲招與共事。惟陛下斷自聖心。勿使小人一進。後有噬臍之悔。疏入。宣仁后曰。轍疑吾兼用邪正。言極中理。調停之說。遂已。

沈潛官兵部尚書。太祖嘗諭致治之要在進賢退不肖。潛因言君子常少。小人常多。在上風厲之耳。賢者舉而不仁者遠矣。帝善其



言明史

劉宗周以工部侍郎告去。復極陳時弊畧云。昔唐德宗謂羣臣曰。人言盧杞奸邪。朕殊不覺。羣臣對曰。此乃杞之所以爲奸也。臣每三覆斯言。爲萬世辨奸之要。故曰。大奸似忠。大佞似信。頻年以來。陛下惡私交。而臣下多以告訐進。陛下錄清節。而臣下多以曲謹容。陛下崇勵精。而臣下奔走承順。以爲恭。陛下尚綜覈。而臣下瑣屑吹求。以示察。凡若此者。正似信似忠之類。其用心無往不出於身家利祿。陛下不察而用之。則聚天下之小人立於朝。有所不覺。然後又擢左都御史。召見中左門。因議督撫去畱。宗周請先去督。師范志完。且曰。宋臣曰。文官不愛錢。武官不惜死。則天下太平。斯



言今日鍼砭也。論者但論才望。不問操守。未有操守不謹而遇事敢前。軍士畏威者。若徒以議論捷給舉動恢張。稱曰才望。取爵位則有餘。責事功則不足。何益成敗哉。莊烈帝曰。濟變之日。先才後守。宗周曰。前人敗壞。皆由貪縱使然。卽如范志完。操守不謹。大將偏裨。無不由賄進。所以三軍解體。由此觀之。操守爲主。

### 稅法

季孫欲以田賦。使冉有訪諸仲尼。仲尼曰。君子之行也。度於禮。施取其厚。事舉其中。斂從其薄。如是。則以邱亦足矣。且季孫若欲行而法。則周公之典在。若欲苟而行。又何訪焉。左傳

文帝躬修儉節。思安百姓。下詔賜民租稅之半。明年遂除民田之



租稅。孝景二年。令民半出田租。三十而稅一。漢書

光武建武六年。詔曰。頃者師旅未解。用度不足。故行什一之稅。今

軍士屯田。糧儲差積。其令郡國收見田租。三十稅一。如舊制。後漢書

唐之始時。授人以口分世業田。而取之以租庸調之法。其用之也。有節。蓋其畜兵以府衛之制。故兵雖多。而無所損。設官有常員之數。故官不濫。而易祿。雖不及三代之盛時。亦可以爲經久之法也。及其弊也。口分世業之田。壞而爲兼并。租庸調之法。壞而爲兩稅。至於鹽鐵轉運。屯田和糴。鑄錢括苗。權利借商。進奉獻助。蓋愈煩而愈弊。以至於亡。唐書

宋制歲賦。其類有五。曰公田之賦。凡田之在官。賦民耕而收其租。



者曰民田之賦。百姓各得專之者曰城郭之賦。宅稅地稅之類也。曰丁口之賦。百姓歲輸身丁錢米也。曰雜變之賦。牛革蠶鹽之類。隨其所出。變而輸之是也。宋史

元之取民。大率以唐爲法。其取於內郡者曰丁稅。曰地稅。此倣唐之租庸調也。取於江南者曰秋稅。曰夏稅。此倣唐之兩稅也。自太宗始行之。及世祖申明舊制。於是輸納之期。收受之式。關防之禁。會計之法。莫不備焉。元史

太祖卽位之初。定賦役法。一以黃冊爲準。冊有丁有田。丁有役。田有租。租曰夏稅。曰秋糧。凡二等。丁曰成丁。曰未成丁。凡二等。成丁而役六十而免。役曰里甲。曰均徭。曰雜泛。凡三等。以戶計曰甲役。



以丁計曰徭役。上命非時曰雜役。府州縣驗冊丁口多寡。事產厚薄。以均適其力。明史

洪武二十年。命國子生武淳等分行州縣。隨糧定區。區設糧長。四人量度田畝方圓。次以字號。悉書主名。及田之丈尺。編類爲冊。狀如魚鱗。號曰魚鱗圖冊。先是詔天下編黃冊。以戶爲主。詳具舊管新收開除寔在之數。爲四柱式。而魚鱗圖冊。以土田爲主。諸原坂墳衍下隰沃瘠沙鹵之別。畢具魚鱗冊。爲經。土田之訟質焉。黃冊爲緯。賦役之法定焉。凡質賣田土。備書稅糧科則。官爲籍記之。毋令產去稅存。以爲民害。

備荒



堯有九年之水。湯有七年之旱。而國無捐瘠者。以畜積多而備先具也。漢書

魏李悝曰。糴甚貴傷民。甚賤傷農。善平糴者。必謹觀歲有上中下孰。大孰則上糴三而舍一。中孰則糴二。下孰則糴一。使民適足。賈平則止。小飢則發小孰之所斂。中飢則發中孰之所斂。大飢則發大孰之所斂而糴之。故雖遇飢饉水旱。糴不貴而民不散。取有餘以補不足也。

宣帝卽位。大司農中丞耿壽昌。白令邊郡皆築倉。以穀賤時增其賈而糴。以利農。穀貴時減賈而糴。名曰常平倉。民便之。

隋度支尚書長孫平奏。令民間每秋家出粟麥一石以下。貧富爲



差儲之間里。以備凶年。名曰義倉。文帝嘉納。自是州里豐衍。北史

太宗銳意於治。尚書左丞建議。自王公以下。計墾田秋熟。所在爲

義倉。歲凶以給民。太宗善之。又置常平倉。唐書

常平義倉。漢隋利民之良法。常平以平穀價。義倉以備凶災。周顯德中。又置惠民倉。以雜配錢分數。折粟儲之。歲歉減價出以惠民。

宋兼存其法焉。宋史

朱熹提舉浙東常平。上言。以常平米爲社倉。詔下其法於諸路。

常平倉。世祖始立其法。豐年米賤。官增價糴之。歉年米貴。減價糴之。義倉亦六年立其法。社置一倉。以社長主之。豐年每親丁納粟五斗。驅丁二斗。無粟聽納雜色。歉年就給社民。元史



明初州縣設預備倉東南西北四所。太祖選耆民運鈔糴米以備賑濟。卽令掌之。天下州縣多所儲蓄。後漸廢弛。弘治三年。限州縣十里以下。積萬五千石。二十里。積二萬石。衛千戶所。萬五千石。百戶所。三百石。考滿之日。稽其多寡。以爲殿最。嘉靖初。諭德顧鼎臣言。秋糧僅足兌運。預備倉無粒米。一遇災傷。輒奏畱他糧。及勸富民借穀。以應故事。乞急復預備倉糧。以裕民。帝乃令有司設法。多積米穀。仍倣古常平法。春賑貧民。秋成還官。不取其息。八年。命各撫按設社倉。令民二三十家爲一社。每朔望。別戶上中下出米。上戶主其事。年飢。酌量貸給。有司造冊送覈。倉虛。罰社首。出一歲之米。其法頗善。然其後無力行者。

明史



理財

冢宰以三十年之通制國用量入以爲出。

禮記

文帝時民背本趨末。賈誼說上曰。積貯者。天下之大命也。今毆民而歸之農。皆著於本。使天下各食其力。末技游食之民。轉而緣南晦。則畜積足。而人樂其所矣。上感誼言。始開籍田。躬耕以勸百姓。鼂錯復說上曰。聖王在上。而民不凍飢者。爲開其資財之道也。民不足。生於不農。不農則不地著。明主知其然。故務民於農桑。薄賦斂。廣畜積。以實倉廩。備水旱。故民可得而有也。明主貴五穀而賤金玉。方今之務。莫若使民務農。

漢書

李藩同平章事。憲宗問前世所以家給。或國匱乏者。何致而然。藩



對儉則足用。敦本則百姓富。反是則匱。

唐書

國之制用如巨商之理財。不求近效而貴遠利。漢文景之殷富。得諸黃老之清靜。爲黃老之學者。大忌紛更。宋法果能然乎。天地生財。其數有限。國家用財。其端無窮。歸於一是。則生衆食寡。爲疾用舒之外。無他技也。

宋史

仁宗時乏國用。言利者爭獻富國計。御史傅堯俞奏曰。度支歲用不足。誠不可忽。然欲救其弊。在陛下儉刻先天下。無奪農時。勿害商旅。不然。徒紛更爲之。無益聚斂者用。則天下殆矣。

蘇轍爲戶部侍郎。因轉對言曰。善爲國者。藏之於民。其次藏之州郡。州郡有餘。則轉運司常足。轉運司足。則戶部不困。唐制。天下賦



稅其一上供。其一送使。其一畱州。比之於今。上供之數可謂少矣。然每有緩急。王命一出。舟車相銜。大事以濟。祖宗以來。法制雖殊。而諸道畜藏之計。猶極豐厚。是以斂散及時。縱舍由已。利柄所在。所爲必成。自熙寧以來。言利之臣。不知本末之術。欲求富國而先困轉運司。轉運司困。則上供不繼。而戶部亦憊矣。

明初。飭農務墾闢。土無萊蕪。人敦本業。又開屯田。中鹽以給邊軍餉。不仰藉於縣官。故上下交足。軍民胥裕。其後。屯田壞於豪強之兼并。計臣變鹽法。於是邊兵悉仰食太倉。轉輸往往不給。世宗以後。耗財之道廣。府庫匱竭。神宗乃加賦重征。礦稅四出。移正供以實左藏。中涓羣小。橫斂侵漁。民多逐末。田卒汙萊。吏不能拊循而



復侵尅之海內困敝而儲積益以空乏。昧者多言復通鈔法。可以富國。不知國初之充裕在勤農桑而不在行鈔法也。明史

### 錢法

太公爲周立九府圜法。錢圓函方。輕重以銖。周景王時。患錢輕。將更鑄大錢。單穆公曰。不可。古者天降災戾。於是乎量資幣。權輕重。以救民。民患輕。則作重幣以行之。於是乎有母權子而行。若不堪重。則多作輕而行之。亦不廢重。於是乎有子權母而行。今王廢輕而行重。民失其資。能無匱乎。王弗聽。卒鑄大錢。文曰寶貨。秦并天下。錢質如周。文曰半兩。重如其文。漢興。以爲秦錢重難用。更鑄莢錢。孝文五年。更鑄四銖錢。文爲半兩。使民放鑄。武帝卽位以來。錢



益多而輕。乃銷半兩錢。更鑄五銖錢。周郭其質。令不得磨取鎔。於是悉禁郡國無鑄錢。專令上林三官鑄。令天下非三官錢不得行。

漢書

王莽居攝。變漢制。造大錢。及世祖受命。復五銖錢。與天下更始。魏文帝罷五銖錢。使百姓以穀帛爲市。至明帝。更立五銖錢。至晉用之不改。

晉書

建元四年。孔覲上鑄錢均貨議。以爲鑄錢之弊。在輕重屢變。重錢患難用。而難用爲累。輕錢弊盜鑄。而盜鑄爲禍。深民所盜鑄。嚴法不禁者。由上鑄錢惜銅愛工也。自漢鑄五銖錢。至宋文帝。歷五百餘年。而不變者。明其輕重可法。得貨之宜。以爲宜鑄錢重五銖。



一依漢法嚴斷剪鑿。小輕破缺者悉不得行。官錢細小者銷以爲大錢。貨既均。百姓樂業矣。南齊書

隋末錢輕。鐵葉皮紙。皆以爲錢。高祖武德四年。鑄開元通寶。積十錢重一兩。得輕重大小之中。唐書

錢有銅鐵二等。而折二折三。當五折十。則隨時立制。行之久者惟小平錢。宋史

元之交鈔寶鈔。雖皆以錢爲文。而錢弗之鑄也。武宗初行錢法。其曰至大通寶者。準銀鈔一釐。曰大元通寶者。準至大通寶一十。其當五當三折二。並以舊數用之。明年仁宗復下詔。以鼓鑄弗給。新舊資用。其弊滋甚。與銀鈔皆廢不行。而專用至元中統鈔云。元史



太祖卽位。頒洪武通寶錢。其制凡五等。曰當十。當五。當三。當二。當一。當十錢重一兩。餘遞降。至重一錢止。各行省皆設寶泉局。與寶源局並鑄。而嚴私鑄之禁。四年。改鑄大中洪武通寶大錢爲小錢。是時商賈沿元之舊。習用鈔。多不通用錢。七年。帝乃設寶鈔提舉司。詔中書省造大明寶鈔。遂罷寶源寶泉局。越二年。復設寶泉局。鑄小錢與鈔兼行。鈔法自永宣之際。漸患不通。至弘正間。竟廢。明史永樂宣德弘治。皆鑄錢。至世宗嘉靖六年。大鑄嘉靖錢。每文重一錢三分。且補鑄累朝未鑄者。嘉靖錢最工。隆萬錢加重半銖。自啟禎新鑄出。舊錢悉棄置。然日以惡薄。大半雜鉛砂。百不盈寸。攄擲輒破碎。末年敕鑄當五錢。不及鑄而明亡。



# 禮制

唐虞之時祭天之屬爲天禮。祭地之屬爲地禮。祭宗國之屬爲人禮。故書云命伯夷典三禮。殷因於夏有所損益。周公救亂弭制斯文。以吉禮敬鬼神。以凶禮哀邦國。以賓禮親賓客。以軍禮誅不虔。以嘉禮合姻好。謂之五禮。成康因之而刑措不用。周衰禮失。秦氏并吞九國。收儀禮歸咸陽。惟採其尊君抑臣以爲時用。漢興叔孫通起朝儀。世祖中興。明皇纂位。祀明堂。襲冠冕。登靈臺。望雲物。得其時制。百姓悅之。洎西京以降。用相裁准。黃初之詳定朝儀。太始之削除乖謬。則宋書言之備矣。梁武始命羣儒。裁成大典。陳武克平建業。多準梁舊。後齊則陽休之。元修伯王晞。熊安生。在周則蘇



綽盧辯。宇文弼。並習於禮者。平章國典。以爲時用。隋高祖命牛弘。辛彥之等。採梁及北齊儀注。以爲五禮云。隋書

唐初卽用隋禮。至太宗時。房元齡。魏徵等。因隋之禮。增以上陵朝廟等。是爲貞觀禮。高宗又詔長孫無忌等。增之。是爲顯慶禮。由是二禮兼行。元宗開元十四年。學士張說。以貞觀顯慶禮儀注前後不同。宜加折衷。乃詔徐堅。李銳等。撰定。是爲大唐開元禮。由是唐之五禮始備。而後世用之。雖時小有損益。不能過也。唐書

五代之衰。亂甚矣。禮文草創。宋太祖開寶中。四方漸平。乃命劉溫叟。李昉等。撰開寶通禮。本唐開元禮而損益之。仁宗嘉祐中。歐陽修纂集散失。主通禮而記其變。及新禮以類相從。爲一百卷。賜名



太常因革禮異於舊者蓋十三四焉徽宗政和三年續修五禮新儀成靖康之厄蕩析無餘南渡中興孝宗時嘗續編太常因革禮  
宋史

章衡熙寧初判太常寺建言自唐纂禮以國恤章爲豫凶事刪而去之故不幸遇事則拮據墜殘茫無所据今宜爲厚陵集禮以貽萬世從之

元興沙漠朝會燕饗之禮多從本俗世祖至元八年命劉秉忠許衡始制朝儀自是皇帝卽位元正天壽節及諸王外國來朝冊立皇后皇太子羣臣上尊號進太皇太后皇太后冊寶暨郊廟禮成羣臣朝賀皆如朝會之儀而大饗宗親錫宴大臣猶用本俗之禮



爲多。元史

洪武二年。詔修禮書。明年告成。賜名大明集禮。其書準五禮而益以冠服車輅儀仗鹵簿字學音樂。凡升降儀節制度名數。纖悉畢具。又屢敕議禮臣編輯成集。在位三十餘年。所可考見者。曰孝慈錄。曰洪武禮制。曰禮儀定式。曰諸司職掌。曰稽古定制。曰國朝制。作。曰大禮要議。曰皇朝禮制。曰大明禮制。曰洪武禮法。曰禮制集要。曰禮制節文。曰太常集禮。曰禮書。若夫釐正祀典。凡天皇太乙六天五帝之類。皆爲革除。而諸神封號悉改從本稱。一洗矯誣陋習。其度越漢唐遠矣。又詔定國恤。父母並斬衰。長子降爲期年。正服旁服。以遞而殺。斟酌古今。蓋得其中。永樂中。又定巡狩監國。及



經筵日講之制。後宮罷殉。始於英宗。陵廟嫡庶之分。正於孝宗。暨  
乎世宗。以制禮作樂。自任其更定之大者。如分祀天地。復朝日夕  
月於東西郊。罷二祖並配。以及祈穀大雩。享先蠶。祭聖師。易至聖  
先師號。皆能折衷於古。獨其排衆議。祔睿宗太廟。躋武宗上。徇本  
生而違大統。以明察始。而以豐昵終矣。明史



欽定四庫全書

卷二十二

六

寶履堂

穀玉類編卷二十二



穀玉類編卷二十三

休寧 汪兆舒果齋輯

經濟類二

樂制

祀典

耕藉

兵制

屯田

刑法

弭盜

肆赦

治河

樂制

黃帝樂曰咸池。帝嚳曰六英。顓頊曰五莖。堯曰大章。舜曰蕭韶。禹曰大夏。殷湯曰濩。周武曰武。漢高祖時叔孫通定篇章。用祀宗廟。武帝裁音律之響。定郊邱之祭。頗襍謳謠。非全雅什。漢明帝時樂有四品。一曰大予樂。郊廟上陵之所用。二曰雅頌樂。辟雍饗射所

用三曰黃門鼓吹樂。天子宴羣臣所用。四曰短簫饒歌樂。軍中所用。又採百官詩頌。以爲登歌。董卓之亂。正聲咸蕩。雅樂卽杜夔。能曉樂事。魏武得夔。使刊定雅律。魏有先代古樂。自夔始也。自此迄晉。用相因循。魏孝文頗爲詩歌。以勗在位。謠俗流傳。布諸音律。大臣馳騁。漢魏旁羅。宋齊功成。舊豫代有制作。莫不各揚廟舞。自造郊歌。梁武帝本自諸生。意先風雅。爰詔凡百。各陳所聞。帝又自糾擿前違。裁成一代。周太祖發蹟關隴。羣臣請功成之樂。式遵周舊。高祖受命。迎神猶帶邊曲。及顏何驟請。頗涉雅音。而繼想聞韶。去之彌遠。

隋書

唐作樂之制尤簡。高祖太宗卽用隋樂。與祖孝孫張文收所定而



已其後世所更者樂章舞曲至於昭宗始得殷盈孫焉故其議論罕所發明

唐書

宋之樂自建隆訖崇寧凡六改作始太祖建隆以來有和峴樂仁宗景祐中有李照樂皇祐中有阮逸樂神宗元豐中有楊傑劉几樂哲宗元祐中有范鎮樂徽宗樂名大晟崇寧以來有魏漢津樂禮樂道喪久矣故宋之樂屢變而卒無一定之論南渡後大抵用先朝之舊其後諸儒朱熹蔡元定輩出乃講明古今制作之本原以究其歸極著爲成書使人知禮樂之難行也惜乎宋祚告終空言而已

宋史

元之樂自太祖徵用舊樂於西夏太宗徵金太常遺樂於燕京及

憲宗始用登歌樂祀天。而世祖用登歌樂享祖。又命王鏞作大成樂。至元三年。初用宮懸登歌。文武二舞於太廟。烈祖至憲宗八室。皆有樂章。又撰社稷樂章。成宗大德間。製郊廟曲舞。仁宗皇慶初。命太常補撥樂工。而樂制日備。大抵於祭祀率用雅樂。朝會饗燕。則用燕樂。蓋雅俗兼用也。元史

明興。太祖銳志雅樂。是時儒臣皆知聲律。相與究切釐定。而掌故闕畧。欲還古音。其道無由。太祖亦方以下情偷薄。務嚴刑以束之。其於履中蹈和之本。未暇及也。文皇帝訪問黃鍾之律。臣工無能應者。英景憲孝之世。宮縣徒爲具文。劉翔胡瑞爲之深慨。世宗制作自任。張鶚李文察以審音受知。終以無成。蓋學士大夫之著述。



止能論其理而施諸五音六律。輒多未叶。樂官能紀其鏗鏘鼓舞。而不曉其義。是以卒世莫能明也。稽明代之制作。大抵集漢唐宋元人之舊。而稍更易其名。凡聲容之次第。器數之繁縟。在當日非不燦然俱舉。第雅俗雜出。無從正之。

明史

### 祀典

漢興。祖廟濫煩。至元帝時。貢禹奏言。古者天子七廟。今惠景廟皆親盡。宜毀。及郡國廟。不應古禮。宜正定。天子下詔議。遂罷郡國廟。韋元成等議曰。禮王者始受命之君。爲太祖。以下五廟而迭毀。所自出之祖。以始祖配。而不爲立廟。親盡也。立親廟。四親親也。親盡而迭毀。親疏之殺。示有終也。周所以七廟者。后稷始封。文王武王。

受命而王。是以三廟不毀。與親廟四而七。他如成王廟。猶不世。今高帝受命定天下。宜爲太祖廟。世世不毀。孝文德至厚。爲太宗廟。孝武功至著。爲世宗廟。奏可。漢書

建武初。張純與朱浮奏言。宗廟奉祀高帝。孝文。孝武。如舊制。又立親廟四世。推南頓君以上。盡於春陵節侯。禮爲人後者爲之子。旣事大宗。則降其私親。今禘祫高廟。而春陵四世。君臣並立。不合禮意。昔高宗以自受命。不由太上。宣帝以孫後祖。不敢私親。故爲父立廟。獨羣臣侍祠。臣謂宜除今親廟。以則二帝舊典。詔下公卿議。以宣元成哀平五帝四世代。今親廟。宣元帝尊爲祖父。可親奉祠。成帝以下。有司行事。別爲南頓君立皇考廟。其祭上至春陵節侯。



晉武帝自受命  
晉孝武帝一係下

晉書作宗  
晉書作宋

羣臣奉祠。光武從之。後漢書

晉孝武帝追崇庶祖母宣太后。議者謂宜配食中宗。臧壽議曰。經云。考仲子之宮。若配食惠廟。則宮無緣別築。漢孝文孝昭太后並繫子爲號。祭於寢園。不配高祖。孝武後漢和帝母曰恭懷后。安帝祖母曰敬隱后。順帝母曰恭愍后。雖不繫子爲號。亦祭於陵寢。不配章安二帝。謂宜遠準陽秋考宮之義。近摹二漢不配之典。尊號旣正。則罔極之情。申別建寢廟。則嚴禰之義。顯繫子爲稱。兼明母貴之所由。一舉而允三義。哲王之高致也。議者從之。宋書

司馬光知諫院。英宗立。光料必有追隆本生事。卽奏言。漢宣帝爲孝昭後。終不追尊衛太子史皇孫。光武上繼元帝。亦不追尊鉅鹿。

南頓君此萬世法也。後詔兩制集議。濮王典禮。學士王珪等莫敢先。光獨奮筆書曰。爲人後者爲之子。不得顧私親。宜準封贈期親尊屬故事。稱爲皇伯。宋史

神宗時議尊僖祖爲始祖。孫固議曰。漢高以得天下與商周異。故太上皇不得爲始封。光武中興不敢祖舂陵而祖高帝。宋有天下傳之萬世。太祖功也。請以爲始祖。而爲僖祖別立廟。禘祫之日奉其祧主東向。以伸其尊。合所謂祖以孫尊。孫以祖屈之意。韓琦見而歎曰。孫公此議足以不朽矣。

遂魯曾爲太常博士。武宗一廟未立。后主配享。丞相伯顏問魯曾曰。先朝旣以眞哥皇后無子不立主。今所立者明宗母乎。文宗母



乎對曰。眞哥后在武宗朝。已膺玉冊。則爲武宗皇后。明文二母后。固妾也。今以無子之故。不爲立主。以妾爲正宮。是爲臣而廢先君之后。爲子而追封父之妾。於禮不可。衆服其議。遂以眞哥后配武宗。元史

世宗初踐阼。議尊崇所生父興獻王。廷臣持之。議三上。三卻。觀政進士張璁上疏曰。廷議執漢定陶宋濮王故事。謂爲人後者爲之子。不得顧私親。夫漢哀帝。宋英宗。固定陶濮王子。然成帝。仁宗。皆預立爲嗣。養之宮中。其爲人後之義甚明。故師丹。司馬光之論。行於彼一時。則可。今武宗無嗣。大臣遵祖訓。以陛下倫序當立而迎立之。遺詔直曰興嗣王長子。未嘗著爲人後之義。則陛下之興實。

所以承祖宗之統與預立爲嗣養之宮中者較然不同議者謂孝  
廟德澤在人不可無後假令聖考尙存嗣位今日恐弟亦無後兄  
之義且迎養聖母以母之親也稱皇叔母則當以君臣禮見恐子  
無臣母之義禮長子不得爲人後聖考止生陛下一人利天下而  
爲人後恐子無自絕其父母之義臣竊謂今日之禮宜別立聖考  
廟於京師使得隆尊親之孝且使母以子貴尊與父同則聖考不  
失其爲父聖母不失其爲母矣帝得疏大喜曰此論出吾父子獲  
全矣贊曰張璠桂萼方獻夫議尊與獻帝未嘗不準情理之中乃  
至遭時得君動引議禮自固務快恩讐於是知其建議之心  
非惓惓忠愛之實欲引其君於當道也。明史

耕藉



孟春之月。擇元辰。天子親載耒耜。措之於參保介之御間。帥三公九卿諸侯大夫。躬耕帝藉。天子三推。三公五推。卿諸侯九推。禮記文帝詔曰。夫農。天下之本也。其開藉田。朕親率耕。以給宗廟粢盛。  
漢書

明帝永平四年。詔曰。朕親耕藉田。以祈農事。十三年。帝耕於藉田。禮畢。賜觀者食。後漢書

金根車。天子親耕所乘也。一名芝車。置耒耜於軾上。晉書

武帝躬耕藉田。潘岳作賦以美其事。

太祖將親耕。以其久廢。使何承天撰儀注。於是度地千畝。開阡陌。皇后帥六宮生種。稑之種。付藉田。令耕。日御金根三蓋車。至藉田。

帝三推三反羣臣以次耕耤田令率其屬耕竟畝

宋書

太宗將親耕給事中孔穎達議曰禮天子耤田南郊今帝社乃東壇未合古太宗曰書稱平秩東作而青輅黛耜順春氣也吾方位少陽田宜於東郊乃耕於東郊元宗親祀神農於東郊配以勾芒遂躬耕盡壠止肅宗詔去耒耜雕刻命改造之天子出通化門釋輶而入壇遂祭神農以后稷配冕而朱紘躬九推焉

唐書

耤田之禮歲不常講雍熙五年真宗始行三推之禮仁宗明道二年行耤田禮

宋史

洪武二年帝建先農壇於南郊在耤田北親祭以后稷配器物祀儀與社稷同祀畢行耕耤禮御耒耜二具韜以青絹御耕牛四被



以青衣禮畢還大次應天府尹及上元江寧兩縣令率庶人終畝  
是日宴勞百官耆老於壇所嘉靖十年又議造耕根車載耒耜建  
觀耕臺一

明史

### 兵制

古者兵法起於井田自周衰王制壞而不復至於府兵始一寓之  
於農得其大意此高祖太宗之所以盛也至其後世不能謹守屢  
變其制蓋唐有天下二百餘年而兵之大勢三變其始盛時有府  
兵府兵後廢而爲彍騎彍騎又廢而方鎮之兵盛矣及其末也強  
臣悍將兵布天下而天子亦自置兵於京師曰禁軍初府兵之制  
居無事時耕於野其番上者宿衛京師而已若四方有事則命將

以出事解輒罷兵散於府將歸於朝故士不失業而將帥無握兵之重及府兵法壞而方鎮盛京師弱措置之勢使然也唐書

宋之兵制大概有三天子之衛兵以守京師備征戍曰禁軍諸州之鎮兵以分給役使曰廂軍選於戶籍或應募使之團結訓練以爲在所防守則曰鄉兵太祖有天下收四方勁兵列營京畿以備宿衛分番屯戍以捍邊圉凡其制爲什長之法階級之辨使之內外相維上下相制者雖以矯累朝藩鎮之弊而其所懲者深矣咸平以後武備漸寬神宗奮然更制聯比其民以爲保甲部分諸路以隸將兵亦足以作一時之氣迨崇寧大觀間增額日廣而乏精銳故無益於靖康之變建炎南渡兵不滿萬用張韓劉岳爲將而



軍聲以振及秦檜主和議士氣遂沮光寧以後募兵雖衆土宇日蹙況上無御將之術將有中制之嫌然沿邊諸壘尙能效忠維持至百五十年而後亡其制兵之有道綜理之周密亦可見矣

宋史

元制宿衛諸軍在內而鎮戍諸軍在外內外相維以制輕重之勢亦一代之良法也世祖時設五衛始有侍衛親軍之屬置都指揮使以領之而其後增置改易禁兵之設不止於前矣鎮戍之兵世祖海宇混一命宗王將兵鎮邊徼襟喉之地而河洛山東則以蒙古探馬赤軍列大府以屯之淮江以南則各藩列郡各以漢軍及新附等軍戍焉皆世祖宏規遠畧足以貽謀于後世

元史

明以武功定天下革元舊制自京師達於郡縣皆立衛所外統之



都司內統於五軍都督府而上十二衛爲天子親軍者不與焉征伐則命將充總兵官調衛所軍領之旣旋則將上所佩印官軍各回衛所蓋得唐府兵遺意文皇北遷一遵太祖之制然內臣觀兵履霜伊始洪宣以後狃於治平故未久而遂有土木之難于謙創立團營簡精銳一號令兵將相習其法頗善憲孝武世四朝營制屢更而威益不振衛所之兵疲於番上京師之旅困於占役馴至未造尺籍久虛行伍衰耗流盜蜂起海內土崩宦豎降於關門禁軍潰於城下而國遂以亡矣

明史

屯田

趙充國將兵討諸羌羌降者萬餘人矣充國度其必壞欲罷騎兵



屯田以待其敝。因條不出兵畱田便宜十二事。宣帝從其計。漢書

曹公用聚祗韓浩等議。始興屯田。自遭荒亂。率乏糧穀。公曰。定國之術在強兵足食。秦人以急農兼天下。孝武以屯田定西域。此先代之良式也。乃募民屯田許下。得穀百萬斛。於是州郡例置田官。所在積穀。征伐四方。無運糧之勞。魏書

任峻從太祖。時聚祗建置屯田。太祖以峻爲典農中郎將。數年中。所在積粟。倉廩皆滿。軍國之饒。起於祗而成於峻。魏志

鄧艾爲尙書郎。時欲廣田畜穀。爲滅賊資。艾以爲昔破黃巾。因屯田。積穀於許都。以制四方。今三隅已定。事在淮南。陳蔡之間。上下田良。可省許昌左右諸稻田。并水東。下令淮北屯二萬人。淮南三

萬人十二分休。常有四萬人且田且守。計除衆費。歲完五百萬斛。以爲軍資也。宣王善之。事皆施行。每東南有事。大軍汎舟而下。達於江淮。資食有儲。而無水害。艾所建也。

諸葛亮悉衆據武功五丈原。與司馬宣王對於渭南。每患糧不繼。使已志不伸。是以分兵屯田。爲久住之基。耕者雜於渭濱居民之間。而百姓安堵。軍無私焉。蜀志

唐開元二十五年。令諸屯隸司農寺者。每五十頃以下。二十頃以上。爲一屯。隸州鎮諸軍者。每五十頃爲一屯。應置者皆從尙書省處分。其舊屯重置者。依前封疆爲定。新置者。並取荒閒無籍廣占之地。其屯官簡堪者充之。杜氏通典



雍熙四年陝西轉運使劉綽上言宜於古原州置屯田無寇則耕  
寇來則戰從之既而原渭州亦開方田戎人內屬者皆依之得安  
其居是時兵費浸廣言屯營田者輒詔邊臣經度行之

漢魏而下置屯田爲守邊之計國初海內旣一內而各衛外而行  
省皆立屯田以資軍餉或因古之制或以地之宜其爲慮甚詳密  
大抵勺陂洪澤甘肅瓜沙因昔人之制地利不減於舊和林陝西  
四川等地則因地之宜肇爲之亦未嘗遺其利至於雲南八番海  
南海北雖非屯田之所而以爲蠻夷腹心之地又制兵屯旅以控  
扼之由是而天下無不可屯之兵無不可耕之地矣

元史

洪武屯田之制曰軍屯曰民屯其制移民就寬鄉或召募或罪徒



者爲民屯皆領之有司而軍屯則領之衛所邊地三分守城七分屯種內地二分守城八分屯種每軍受田五十畝爲一分給耕牛農具教樹植復租賦遣官勸輸誅侵暴之吏初畝稅一斗三十五年定科則軍田一分正糧十二石貯屯倉聽本軍自支餘糧爲本衛所官軍俸糧

明史

左光斗選授御史出理屯田言北人不知水利一年而地荒二年而民徙三年而地與民盡矣今欲使旱不爲災澇不爲害惟有興水利一法因條上三因十四議曰因天之時因地之利因人之情曰議濬川議疏渠議引流議設壩議建閘議設陂議相地議築塘議招徠議擇人議擇將議兵屯議力田設科議富民拜爵其法犁



然具備詔悉允行水利大興北人始知穫稻鄒元標嘗曰三十年前都人不知稻草何物今所在皆稻種水田利也

### 刑法

漢典高祖初入關約法三章蠲削煩苛孝惠高后時蕭曹爲相填以無爲刑罰用稀孝文惡亡秦之政禁網疏闊選張釋之爲廷尉罪疑者予民是以刑罰大省至於斷獄四百有刑錯之風除肉刑景帝下詔減答法定筆令宣帝置廷平季秋後請讞時上常幸宣室齋居而決事獄刑號爲平矣

漢書

光武中興畱心庶獄常臨朝聽訟躬決疑事章帝納陳寵言決罪行刑務於寬厚是後獄法和平

晉書刑法志

高祖哀矜庶獄。至於奏讞。率從降恕。全命徙邊。歲以千計。京師決死獄。不過五六。州鎮亦簡。魏書

太宗畱心聽斷。著令。州縣論死三覆。奏京師五覆。奏獄已決。尙芋然爲撤膳止樂。至晚節。天下刑幾措。唐書

高祖太宗除隋虐亂。治以寬平。民樂其安。重於犯法。自高宗武后以來。毒流邦國。唐祚絕而復續。元宗初勵精爲政。二十年間。刑獄減省。歲斷死罪。纔五十八人。以此見致治雖難。勉之則易。自此以後。兵革遂興。國家多故。凡所更革。一切臨時。苟且或重或輕。徒爲繁文。不足以示後世。

宋興承五季之亂。太祖太宗頗用重典。以繩姦慝。歲時躬自折獄。



慮囚務底明慎而以忠厚爲本立法之制嚴而用法之情恕獄有小疑覆奏輒得減宥民樂其生重於犯法元豐以來儉邪並進刑政紊矣國旣南遷威柄下逮刑之寬猛繫乎其人然累世猶知以愛民爲心祖宗之遺意蓋未泯焉

宋史

元初斷理獄訟循用金律頗傷嚴刻及世祖平宋疆理混一由是簡除煩苛始定新律世祖謂宰臣曰朕或怒有罪者使汝殺汝勿殺必遲回一二日乃覆奏雖古仁君何以過之自後繼體之君惟刑之恤凡郡國有疑獄必遣官覆讞而從輕死罪審錄無寃者亦必待報然後加刑君臣之間惟知輕典之尙百年之間天下乂寧豈偶然而致哉然元之刑法其得在仁厚其失在乎緩弛而不知



檢也。元史

吳元年命左丞相李善長爲律令總裁官。叅知政事楊憲等二十人爲議律官。諭之曰：「法貴簡當，使人易曉。若條緒繁多，或一事兩端，可輕可重，吏得因緣爲奸，非法意也。夫網密則水無大魚，法密則國無全民。卿等悉心叅究，日具刑名條目以上。吾親酌議焉。」明史太祖懲元縱弛之後，刑用重典，然特取決一時，非以爲則。後屢詔釐正，至三十年始申畫一之制。所以斟酌損益之者，至纖至悉，令子孫守之。羣臣有稍議更改，卽坐以變亂祖制之罪。而後乃滋弊者，由於人不知律，妄意律舉大綱，不足以盡情僞之變。於是因律起例，因例生例，例愈紛而弊愈無窮。至如律有取自上裁臨時處



治者因罪在八議不得擅自勾問與一切疑獄罪名難定及律無正文者設非謂朝廷可任情生殺之也英憲以後欽恤之意微偵伺之風熾巨惡大憝案如山積而旨從中下縱之不問或本無死理而片紙付詔獄爲禍尤烈矣

### 弭盜

張敞守京兆尹時長安市偷盜多敞求問長安父老偷盜酋長數人居皆溫厚敞召見責問令致諸偷以自贖偷長願受署敞皆以爲吏遣歸休置酒小偷悉來賀且飲醉偷長以赭汙其衣裾吏坐里閭閱出者汙赭輒收縛之一日捕得數百人窮治所犯盡行法罰由是枹鼓稀鳴市無偷盜

漢書



龔遂以明經爲官。渤海郡歲饑，盜賊並起。宣帝選能治者，以遂爲渤海太守。問何以息盜，對曰：「治亂，民猶治亂，繩不可急也。」願無拘臣以文法，得一切便宜從事。上許焉。遂至渤海，移書勅屬縣悉罷捕盜賊吏，諸持鉏鉏田器者，皆爲良民。吏毋得問持兵者，乃爲盜賊盜賊聞，遂教令，卽時解散，棄其兵弩，而持鉏鉏盜賊於是悉平。張綱爲御史，時廣陵賊張嬰等數萬人寇亂，揚徐間積十餘年，朝廷不能討，乃以綱爲廣陵太守。前遣郡守率多求兵，綱獨單車之職。旣到，將吏卒十餘人徑造嬰壘，以慰安之。求得與長老相見，申示國恩。嬰初大驚，旣見綱誠信，乃出拜謁。綱延置上坐，問所疾苦，乃譬之以利害。嬰聞泣下曰：「荒裔愚人，若魚遊釜中。今聞明府之



言乃嬰等更生之辰也。既陷不義，實恐投兵之日，不免孥戮。綱約以天地誓，以日月嬰，深感悟，乃辭還營。明日，將所部萬餘人歸降。綱散遣部衆，親爲卜居宅，相田疇。子弟欲爲吏者，皆引召之。人情悅服。南州晏然。

後漢書

虞詡拜郎中。朝歌賊窋李等數千人屯聚連年，州郡不能禁。乃以詡爲朝歌長。詡到官，募壯士，使入賊中，誘令劫掠，乃伏兵以待之。遂殺賊數百人。又潛遣人能縫者，傭作賊衣，以采綖縫其裾爲幟。有出市里者，吏輒禽之。賊由是駭散。

李崇爲兗州刺史。兗土舊多劫盜，崇乃村置一樓，樓懸一鼓。盜發之處，雙槌亂擊。四面諸村，始聞者，搥鼓一通；次復聞者，以二爲節。

次復聞者以三爲節諸村聞鼓皆守要路盜竊始發便爾擒送諸州置樓懸鼓自崇始也

魏書

高祖問高祐止盜之方祐曰昔宋均樹德害獸不過其鄉卓茂善教蝗虫不入其境彼盜賊者人也苟訓之有方寧不易息須臾守貞良則盜止矣

唐太宗與羣臣論止盜或謂重法以禁之上曰民之所以爲盜者由賦繁役重飢寒切身故不暇顧廉耻耳朕當去奢省費輕徭薄賦選用廉吏使民衣食有餘則自不爲盜安用重法耶自是數年之後海內昇平外戶不閉商旅野宿焉

通鑑

張栻爲荆湖轉運副使湖北多盜府縣往往縱釋以病良民栻首



劾大吏之縱賊者捕斬姦民之舍賊者令其黨得相捕告以除罪盜皆遁去

宋史

萬觀知嚴州府府東境七里瀧有漁舟數百艇時剽行旅觀編十舟爲一甲令畫地巡警不匝凡盜屏跡

明史

李驥授河南知府河南境多盜驥爲設火甲一戶被盜一甲償之犯者大署其門曰盜賊之家又爲勸教文振木鐸以徇之自是人咸改行道不拾遺

胡友信知順德縣鄉立四應社一鄉有警三鄉鼓而援之不援者罪同賊賊不敢發歲大凶民饑死無敢爲惡者

肆赦

貫索九星。七星見。小赦五星。六星大赦。晉書

大司馬吳漢病篤。光武問所欲言。對曰。臣愚無所知。惟願陛下慎無赦。後漢書

後帝九年赦。大司農孟光責大將軍費禕曰。赦者偏枯之物。必不得已。乃可行之。今有何急而施非常之恩。以惠姦宄之惡乎。禕顧謝踖踖而已。初丞相亮時有言。公惜赦者。亮曰。治世以大德。不以小惠。故匡衡吳漢不願爲赦。先帝亦言。吾周旋陳元方鄭康成間。見啟告治道悉矣。曾不語赦也。若劉景升父子。歲歲赦宥。何益於治乎。通鑑

赦日。植金雞竿於仗南。竿長七尺。上有雞。黃金飾首。銜幡長七尺。



集囚徒於闕下。令衛尉宣制。訖乃釋之。唐書

太宗謂羣臣曰。吾聞語曰。一歲再赦。好人啼啞。吾有天下。未嘗數赦者。不欲誘民於幸免也。

張允爲散騎常侍。晉高祖卽位。屢赦天下。允爲駁。赦論以獻。曰。管子曰。凡赦者。小利而大害。久而不勝其禍。無赦者。小害而大利。久而不勝其福。蓋不赦不爲無恩。罰有罪故也。自古皆以水旱則降德音。出囚。冀感天以救災者。非也。若有罪者。見舍。則無罪者。銜冤。此致災之道。非救災之術也。至使小人遇天災。則皆喜而爲惡。曰。國將赦矣。則是教民爲惡也。高祖覽之大悅。五代史

耶律楚材爲中書令。太宗疾篤。醫言脉已絕。皇后不知所爲。召楚



材問之對曰。今任使非人。囚繫非辜者多。古人一言而善。榮惑退。舍請赦天下囚徒。后卽欲行之。楚材曰。非君命不可。俄頃帝少蘇。因奏請肆赦。帝已不能言。首肯之。是夜醫者候脉復生。適宣讀赦書時也。翼日而瘳。元史

張雄飛參知政事。世祖上尊號。議赦天下。雄飛諫曰。古人言無赦之國。其刑必平。故赦者不平之政也。聖明在上。豈宜數赦。帝嘉納之。遂止降輕刑之詔。

永樂四年。西域貢佛舍利。禮部尙書鄭賜因請釋囚。帝曰。梁武元順溺佛教。有罪者不刑。紀綱大壞。此豈可效。明史

治河



導河積石。至於龍門。南至于華陰。東至于底柱。又東至于孟津。東過洛汭。至于大伾。北過洛水。至于大陸。又北播爲九河。同爲逆河。入于海。書經

今天子元光中。河決瓠子。梁楚之地尤甚。乃使汲仁。郭昌發卒數萬人。塞瓠子。決河。天子自臨決河。沈白馬玉璧。令羣臣從官皆負薪。寘決河。作瓠子歌。於是卒塞瓠子。築宮其上。曰宣房宮。而道河北行。二渠復禹舊迹。而梁楚復寧。史記

哀帝初。求能浚川。䟽河者。待詔賈讓。奏治河有上中下策。善爲川者。決之使道。故徙冀州之民。當水衝者。決黎陽。遮害亭。放河使北入海。河西薄太山。東薄金堤。勢不能遠汎濫。期月自定。此上策。若

多穿漕渠於冀州地使民得以溉田分殺水怒此中策若繕完故堤增卑培薄勞費無已此下策

漢書

黃河自入中國東出孟津過虎牢而後奔放平壤吞納小水以百數勢益雄放無崇山巨礪以防閑之旁激奔潰不遵禹蹟故虎牢迤東距海口三二千里恒被其害宋爲特甚始自滑臺大伾嘗雨經汎溢復禹蹟矣一時姦臣建議必欲回之俾復故流竭天下之力以塞之屢塞屢決至南渡而後貽其禍於金由不能順其就下之勢以導之故也

宋史

至正四年黃河決順帝集羣臣議惟賈魯昌以二策獻一議修築北堤以制橫潰其用功省一議疏塞並舉挽河使東行以復故道



其功費大。丞相脫脫。躡其後策。詔命魯昌爲總治河防使。四月鳩工。十一月工畢。河乃復故道。南滙於淮。又東入於海。帝命翰林承旨歐陽元。製河平碑文。以旌勞績。元又作至正河防記。欲使罹河患者。按而求之。

元史

宋禮拜工部尙書成祖肇建北京。轉漕東南。河海並運。海運險遠。多失亡。而河運則浮淮入河。至陽武。陸輓百七十里入衛河。歷八遞運所。民苦其勞。至是用濟寧州同知潘正叔言。命禮開會通河。二十旬而功成。而平江伯陳瑄治河江淮間。功亦相繼告竣。由是海陸並罷。南極江口。北盡大通橋。運道三千餘里。河渠之利。世享其成。

明史

萬曆六年以潘季馴代河漕尚書吳桂芳治河季馴以淮清河濁  
淮弱河強河水一斗沙居其六伏秋則居其八非極湍急必致停  
滯當藉淮之清以刷河之濁築高堰束淮入清口以敵河之強使  
二水並流則海口自濬條上六事詔如議明年冬兩河告成



穀玉類編卷二十四

休寧汪兆舒果齋輯

儒術類一

經學  
博聞

理學  
鈔書

史學

字學

篤好

經學

觀書者譬諸觀山及水升東嶽而知衆山之剡施也况介邱乎浮  
滄海而知江河之滂沱也况枯澤乎捨舟航而濟乎瀆者末矣捨  
五經而濟乎道者末矣棄常珍而嗜乎異饌者惡覩其識味也委  
大聖而嗜乎諸子者惡覩其識道也揚子法言

古之學者耕且養三年通一經

易魏王弼注唐孔穎達疏

繫辭晉韓康伯注

書漢孔安國傳

詩漢毛萇注孔穎達疏

鄭元箋

春秋左氏

晉杜預注孔穎達疏

禮記鄭元注孔穎達疏

公羊漢何休學疏不著人名或云唐徐彥撰

穀梁晉范甯集解唐楊士勳疏

儀禮周禮鄭元注唐賈公彥疏

論語魏何晏集解宋邢昺疏

孟子漢趙岐注宋孫奭疏

孝經唐明皇御注邢昺疏

爾雅晉郭璞注邢昺疏

朱雲從博士受易能傳其業時少府五鹿充宗為梁邱易元帝欲

考其異同令充宗與諸易家論充宗乘貴辨口諸儒莫能抗有薦

雲者召入既論難連挂五鹿君諸儒為之語曰五鹿嶽嶽朱雲折

其角漢書



匡衡好學尤精詩諸儒爲之語曰無說詩匡鼎來

劉向校書天祿閣專精覃思夜有老人植青藜杖叩閣而進吹杖端火燃授向五行洪範之文云是太乙之精天帝聞卯金之子有

博學者使下觀焉

三輔黃圖

戴憑爲侍中正旦朝賀光武令羣臣能說經者更相難詰義有不通輒奪其席以益通者憑遂重坐五十餘席

後漢書

賈逵弱冠能誦左氏傳及五經本文以大夏侯尚書教授雖爲古學兼通五家穀梁之說自爲兒童常在太學不通人間事身長八尺二寸諸人爲之語曰問事不休賈長頭

五家謂尹更始劉向周廣丁姓王彥皆爲穀梁

之說

世傳鄭康成爲經神何休爲學海拾遺記

井丹字大春少通五經善談論故京師爲之語云五經紛綸井大

春三輔決錄

王肅善賈馬之學而不好鄭氏采會同異而爲尚書詩論語二禮

左氏解魏志

庾峻少好學舉博士時重莊老而輕經史峻懼雅道陵遲乃潛心

儒典高貴鄉公幸太學問尚書義峻發明經旨申暢凝滯晉書

杜預耽思經傳爲春秋左氏經傳集解嘗自言有左傳癖

宋孝武帝好文章天下悉以文采相尚莫以專經爲業王儉弱年

畱意三禮尤善春秋發言吐論造次必於儒教由是衣冠翕然並



尚經學儒教大興

南史

房暉遠治三禮春秋詩書周易牛弘稱爲五經庫

隋書

谷耶律淹識羣書褚遂良稱爲九經庫

唐書

王元感撰書糾繆春秋振滯禮繩愆等書凡數十百篇魏知古見其書歎曰五經指南也徐堅等薦之下詔褒美以爲儒宗

吳澄於經傳皆習通之知用力聖賢之學元明善以文學自負嘗問澄易詩書春秋奧義歎曰與吳先生言如探淵海遂執弟子禮終身

元史

黃潛博極天下之書而約之於至精剖析經史疑難及古今因革制度名物之屬旁引曲證多先儒所未發

趙汭從臨川虞集游。獲聞吳澄之學。乃築東山精舍。讀書著述其中。造詣精深。諸經無不通貫。明史

陳謨遂於經學。旁及子史百家。涉流探源。辨析純駁。犁然要於至當。

鎮國中尉睦樸。覃精經學。從河洛間宿儒游。年二十通五經。尤邃於易春秋。謂本朝經學一稟宋儒。古人經解。殘闕放失。乃訪求海內通儒。繕寫藏弃。若李鼎祚易解。張洽春秋傳。皆敘而傳之。呂柟嘗與論易。歎服而去。

陳繼。吳人。幼孤。母吳氏躬織以資誦讀。比長。貫穿經學。人呼爲陳五經。儒林傳序云。有明諸儒。衍伊洛之緒。言探性命之奧。旨錙銖或爽。遂啟岐趨。襲謬承譌。指歸彌遠。至專門經訓。授受源流。



則二百七十餘年間未聞以此名家者經學非漢唐之專精  
性理襲宋元之糟粕論者謂科舉盛而儒術微殆其然乎

### 理學

漢武帝建元元年舉賢良方正直言極諫之士親策問之廣川董  
仲舒對云云天子善其對以爲江都相事易王王帝兄素驕好勇  
仲舒以禮匡正王敬重焉嘗問之曰粵王句踐與大夫泄庸種蠡  
伐吳滅之寡人以爲粵有三仁何如仲舒對曰仁人者正其誼不  
謀其利明其道不計其功是以仲尼之門五尺之童羞稱五霸爲  
其先詐力而後仁義也繇此言之則粵未嘗有一仁也王曰善宋  
程子曰漢之諸儒惟董子有儒者氣象通鑑綱目  
韓愈以六經之文爲諸儒倡當其所得粹然一出於正刊落陳言

橫驚別驅。汪洋恣肆。要之無牴牾。聖人者。至進諫陳謨。排難卹孤。矯拂媮末。皇皇於仁義。可謂篤道君子矣。自晉迄隋。老佛顯行。聖道不斷。如帶諸儒。倚天下正議。助爲怪神。愈獨喟然。引聖爭四海之惑。昔孟軻距楊墨。去孔子才二百年。愈排二家。乃去千餘歲。撥衰反正。功有與齊。而力倍之。所以過况雄不少矣。

唐書

邵雍始爲學。卽堅苦刻厲。北海李之才授以河圖洛書六十四卦圖象。而雍探賸索隱。妙悟神契。汪洋浩博。多其所自得者。及其學益老德益邵。玩心高明。以觀夫天地之運化。陰陽之消長。遠而古今世變微。而飛走草木之性情深造。曲暢庶幾。所謂不惑者。遂衍伏羲先天之旨。著書十餘萬言。程顥稱雍之道純一不雜。就其所



至可謂安且成矣。宋史

周敦頤博學力行。著太極圖。明天理之根源。究萬物之終始。又著通書。發明太極之蘊序。者謂其言約而道大。文質而義精。得孔孟之本原。大有功於學者。

頤自年十五六時。與弟頤聞周敦頤論學。慨然有求道之志。汎濫於諸家。出入於老釋者幾十年。返求諸六經。而後得之。秦漢以來。未有臻斯理者。頤之死。弟頤序之曰。孟軻死。聖人之學不傳。先生生於千四百年之後。得不傳之學於遺經。以興起斯文爲己任。辨異端。闢邪說。使聖人之道復明於世。蓋自孟子之後。一人而已。程頤於書無所不讀。其學本於誠。以大學語孟中庸爲標指。而達

於六經動止語默一以聖人爲師其不至於聖人不止也卒得孔孟不傳之學以爲諸儒倡

張載志道精思未始須臾息也其學尊禮貴德樂天安命以易爲宗以中庸爲體以孔孟爲法世稱爲橫渠先生著正蒙西銘程顥言西銘明理一而分殊擴前聖所未發與孟子性善養氣之論同功

朱熹少時慨然有求道之志聞延平李侗嘗學於羅從彥徒步往從之其爲學大抵窮理以致其知反躬以踐其實而以居敬爲主嘗謂聖經道統之傳載在方冊聖經之旨不明而道統之傳始晦於是竭其精力以研窮聖賢之經訓而註釋之其門人黃幹曰道



之正統待人而傳由孔子而後曾子子思得其微至孟子而始著  
由孟子而後周程張子繼其絕至熹而始著識者以爲知言  
趙復原義農堯舜所以繼天立極孔子顏孟所以垂世立教周程  
張朱所以發明紹續者作傳道圖而以書目條列於後又取伊尹  
顏淵言行作希賢錄使學者知所慕嚮然後求端用力之方備矣  
許衡郝經劉因皆得其書而尊信之北方知有程朱之學自復始  
元史

薛暄學一本程朱其修己教人以復性爲主充養邃密言動咸可  
法嘗曰自考亭以後斯道已大明無煩著作直須躬行耳有讀書  
錄二十卷平易簡切皆自言其所得學者宗之

明史

史學

古者人君外朝則有國史內朝則有女史舉則左史書之言則右史書之以無諱示後世孔叢子

四史昉於黃帝五史建於蒼籒右言左動官宿其業言爲尚書紀謨訓而舉其綱事爲春秋繫日月而詳其目玉海

史記漢司馬遷撰 漢書漢班固撰 後漢書宋范曄撰

三國志晉陳壽撰 晉書唐太宗撰 宋書梁沈約撰

齊書梁蕭子顯撰 梁書唐姚思廉撰 陳書同上

魏書齊魏收撰 北齊書隋李百藥撰 周書唐令狐德棻等撰

隋書紀傳唐魏徵上志長孫無忌等撰 南史北史唐李延壽撰



唐書

紀志表宋歐陽修撰  
列傳宋祁撰

五代史

歐陽修撰

宋史

元脫脫等修

遼史金史

脫脫修

元史

明宋濂王禕等修

明史

本朝張廷玉等修

晉靈公侈趙盾諫不聽遂奔未出晉境趙穿襲殺靈公於桃園盾復位太史董狐書曰趙盾弑其君以視於朝盾曰弑者趙穿我無罪太史曰子爲正卿而亡不出境反不誅國亂非子而誰孔子聞之曰董狐古之良史也書法不隱史記

齊崔武子弑莊公大史書曰崔杼弑其君崔子殺之其弟嗣書而死者二人其弟又書乃舍之南史氏聞大史盡死執簡以往聞旣書矣乃還左傳

朱敬則修國史侍中韋安石嘗閱其史葉歎曰董狐何以加世人不知史官權重宰相宰相但能制生人史官兼制生死古之聖君賢臣所以畏懼者也

唐書

劉子元領國史且三十年鄭惟忠嘗問自古文士多史才少何耶子元曰史有三長才學識世罕兼之故史才少夫有學無才猶愚賈操金不能殖貨有才無學猶巧匠無榱桷斧斤弗能成室善惡必書使驕君賊臣知懼此爲無可加者時以爲篤論

吳兢直史館敘事簡核號良史初兢與劉子元撰武后實錄敘張昌宗誘張說誣證魏元忠事頗言說已然可賴宋璟等激厲故轉禍爲福後說爲相知兢所爲謬謂曰劉生書魏齊公事不少假借



奈何兢曰子元已亡不可受誣地下兢實書之說屢以情蘄改辭曰徇公之情何名實錄卒不改世謂今董狐

劉恕篤好史學自太史公所記下至周顯德末紀傳之外至私記雜記無所不覽上下數千載間鉅微之事如指諸掌司馬光編資治通鑑英宗擇才共修之光曰專精史學惟劉恕耳即召爲局僚

宋史

袁樞分修國史章惇家以其同里宛轉請文飾其傳樞曰子厚負國欺君吾爲史官書法不隱寧負鄉人不可負天下後世公議時相趙雄總史事見之歎曰無愧古良史

揭傒斯爲翰林學士詔修遼金宋三史與爲總裁丞相問修史以

何爲本。曰用人爲本。有學問文章而不知史事者不可與有學問文章。知史事而心術不正者不可與用人。之道又當以心術爲本也。後斯以筆削自任。凡政事得失。人材賢否。一律以是非之公。元陳于陞少從父以勤習國家故實爲史官。益究經世學。以前代皆修國史。疏言臣考史家之法。紀表志傳。謂之正史。宋去我朝近制尤可考。真宗祥符間。王旦等撰進太祖太宗兩朝正史。仁宗天聖間。呂夷簡等增入真宗朝名三朝國史。此則本朝君臣自修本朝正史之明證也。我朝史籍止有列聖實錄。正史闕焉。未講伏覩朝野所撰次。可備採擇者。無慮數百種。倘不及時網羅。歲月浸邈。卷帙散脫。耆舊漸凋。事跡罕據。欲成信史。將不可得。惟陛下立下明



詔設局編輯使一代經制典章犁然可考鴻謨偉烈光炳天壤豈非萬世不朽盛事哉詔從之

明史

### 字學

書之所起起自黃帝倉頡有象形諧聲會意轉註假借指事六義之別自倉頡訖漢初書經五變一曰古文卽倉頡所作二曰大篆周宣王時史籀作三曰小篆秦李斯作四曰隸書程邈作五曰草書漢初作秦世旣廢古文始用八體有大篆小篆刻符摹印虫書署書殳書隸書漢以六體教學童有古文奇字篆書隸書繆篆虫鳥并藁書楷書懸鉞垂露飛白等二十餘種之勢皆出於上六書因事生變也魏世又有八分書

隋書經籍志

衛恒爲四體書勢曰昔在黃帝有沮誦倉頡者始作書契以代結繩有六義焉曰指事象形諧聲會意轉注假借自黃帝至三代其文不改及秦用篆書焚燒先典而古文絕矣漢武時魯恭王壞孔子宅得尚書春秋論語孝經時人以不復知有古文謂之科斗書漢世秘藏希得見之魏初傳古文者出於邯鄲淳太康元年汲縣人盜發魏襄王塚得策書十餘萬言古書亦有數種其一卷論楚事者最爲工妙恒竊悅之故竭愚思以贊其美冀以存古人之象焉

以上序古文

周宣王時史籀始著大篆或與古同或與古異世謂之籀書及秦兼天下李斯作倉頡篇趙高作爰歷篇胡毋敬作博學篇皆取大篆或頗省改所謂小篆者或曰程邈作自秦壞古文有



八體曰大篆小篆刻符虫書摹印署書及書隸書王莽時使甄豐校文字改定古文復有六書一曰古文孔氏壁中書也二曰奇字卽古文而異者三曰篆書秦篆書也四曰佐書卽隸書五曰繆篆所以摹印六曰鳥書所以書幡信漢建初中扶風曹喜少異於李斯而亦稱善邯鄲淳師焉畧究其妙韋誕師淳而不及也漢末蔡邕采斯喜之法爲古今雜形然精密閑理不如淳也以上序篆書秦旣用篆奏事繁多篆字難成令吏人佐書曰隸字隸者篆之捷也上谷王次仲始作楷法至靈帝好書時多能者而師宜官爲最梁鵠宜爲大字邯鄲淳宜爲小字鵠謂淳得次仲法鵠弟子毛弼教於秘書今八分皆弼法也魏初有鍾胡二家爲行書法鍾氏小異然



亦各有巧。今大行於世云。

以上序  
隸書

漢興而有草書。不知作者姓名。

至章帝時，杜度號善作篇。後有崔瑗、崔寔亦工。弘農張伯英因而轉精。韋仲將謂之草聖。河間張超亦有名。然不如伯英之得其法。

也。

以上序草書。晉書。

### 篤好

甯越苦耕稼之勞。謂其友曰：何爲可以免此？其友曰：莫如學也。學二十歲則可以達矣。越曰：請以十五歲人將休。吾不敢休。人將臥。吾不敢臥。學十五歲而爲周威王之師。

呂氏春秋

董仲舒下帷講誦三年不觀於舍園。其精如此。

史記

匡衡勤學而無燭。衡乃穿壁以書映光而讀之。邑人文不識家富。



多書。衡乃與其傭作而不求償。主人問之。衡曰：「願得主人書遍讀之。」主人資給以書。遂成大學。西京雜記

桓榮少學長安。常客傭以自給。精力不倦。十五年不窺家園。至天下亂。榮抱其經書與弟子逃匿山谷。雖常飢困而講論不輟。

朱穆耽學。銳意講論。或時思至。不自知亡失衣冠。顛墜阬岸。其父常以爲專愚。幾不知數馬足。後漢書

高鳳家以農爲業。而專精誦讀。晝夜不息。其妻嘗之田。曝麥於庭。令鳳護雞。時天暴雨。而鳳持竿誦經。不覺潦水流麥。

皇甫謐耽玩典籍。忘寢與食。時人謂之書淫。晉書

車胤博學多通。家貧不常得油。夏月則練囊盛數十螢火以照書。

以夜繼日焉。

孫康貧嘗映雪讀書。南史

江泌貧晝斫屨爲業。夜讀書。隨月光。光斜則握卷升屋。睡極墮地。則更登。

劉峻好學。自課讀書。常燎麻炬。從夕達旦。時或昏睡。爇其髮。旣覺復讀。從魏還平原。自謂所見不博。更求異書。聞京師有者。必往祈借。崔慰祖謂之書淫。梁書

鄭灼性精勤。鈔義疏。以日繼夜。常蔬食。講授苦心。熱若瓜時。輒偃臥。以瓜鎮心。起便讀誦。陳書

樊深性好學。老而不怠。朝暮還往常。據鞍讀書。至馬驚墜地。終亦



不改後周書

畢誠早孤。夜燃薪讀書。母卹其疲。奪火使寐。不肯息。遂通經史。唐書

宋范仲淹。夜讀書帳中。帳頂如墨色。及貴。夫人以示諸子。曰。爾父

少時勤學。燈焰之跡也。潛確類書

許衡嗜學如飢渴。貧無書。嘗從日者家見書。疏義。因請寓宿。手鈔

歸。旣逃難。徂徠山。始得易。王輔嗣說。時兵亂中。衡夜思。晝誦。身體

力踐之。元史

王冕幼貧。父使牧牛。竊入學舍。聽諸生誦書。暮乃返。亡其牛。父怒

撻之。已而復然。母曰。見癡如此。曷不聽其所爲。因去。依僧寺。夜坐

佛膝上。映長明燈讀書。會稽韓性聞而異之。錄爲弟子。遂稱通儒。

明史

李時勉。成童時。冬寒。以衾裹足。納桶中。誦讀不已。

曹端讀宋儒太極圖通書西銘。歎曰。道在是矣。篤志研究。坐下著足處。雨瓢皆穿。

羅洪先言事。斥歸。益甘淡泊。鍊寒暑。躍馬挽強弓。考圖觀史。自天文地志。禮樂典章。河渠邊塞。戰陣攻守。下逮陰陽算數。靡不精究。至人才吏事。國計民情。悉加意諮訪。曰。苟當其任。皆吾事也。

少卿都穆。吳縣人。年五十四。乞休。旣致仕。齋居蕭然。日事讎討。吳門有娶婦者。夜大風雨。滅燭。徧乞火。無應者。雜然曰。南濠都少卿

家有讀書燈。扣其門。果得火。

列朝詩集小傳



博聞

鄭公孫僑如晉聘。且問疾。叔向曰：寡君之病，卜人曰：實沈、臺駘爲祟。史莫之知，敢問此何神也？子產曰：昔高辛氏有二子，季曰實沈，帝遷實沈于大夏主參，實沈參神也。金天氏有裔子曰昧，爲元冥師，生臺駘。臺駘能業其官，帝封諸汾川，臺駘汾神也。抑此二者，不及君身。晉侯聞子產之言，曰：博物君子也。左傳

張安世用善書給事尚書，上行幸河東，嘗亡書三篋，詔問莫能知，惟安世識之，具作其事。後購求得書以相校，無所遺失，上奇其材，擢爲尚書令。漢書

漢武帝幸甘泉，長坂道中有虫，赤如肝，頭目口齒悉具，人莫知也。

東方朔曰。此古獄地也。積憂所致。上使按圖。果秦獄地。朔曰。積憂者得酒而解。乃取虫置酒中。立消。述異記

漢武帝祀甘泉。至渭橋。有女子浴於渭水。乳長七尺。上怪其異。遣問之女曰。帝後第七車侍中。知我所來。時張寬在第七車。對曰。天星主祭祀者。齋戒不潔。則女人見。搜神記

張華博物洽聞。世無與比。陸機嘗餉華鮓。時賓客滿座。華發器便曰。此龍肉也。衆未之信。華曰。試以苦酒濯之。必有異。既而五色光起。機還問鮓主。果云園中茅積下得一白魚。質狀殊常。以作鮓。過美。故以獻。武庫封閉甚密。其中忽有雉。華曰。此必蛇化爲雉也。開視。雉側果有蛇蛻焉。吳郡臨平岸崩。出一石鼓。槌之無聲。武帝



以問華。華曰：「可取蜀中桐杙，刻爲魚形，叩之則鳴矣。」於是如其言。果聲聞數里。華之博物多此類。

晉書

束皙博學多聞。時有人於嵩高山下得竹簡一枚，上兩行科斗書，傳以相示。莫有知者。張華以問皙，皙曰：「此漢明帝顯節陵中策文也。檢驗果然，時人服其博識。」

何承天博見古今。張永開古冢，得一銅斗，有柄。文帝以訪朝士。承天曰：「此威斗。王莽三公亡賜之一。在冢外，一在冢內。時三公居江左者，惟甄邯。俄而永啟冢內，更得一斗。石銘大司徒甄邯之墓。」

南史

陸澄博覽無所不知。王儉自以博聞多識，集學士何憲等，盛自商畧。澄俟儉語畢，然後談所遺漏數百千條，皆儉所未覩。儉乃歎服。

竟陵王子良得古器小口方腹而底平可將七八升以問澄澄曰此名服匿單于以與蘇武子良詳視器底有字髣髴可識如澄所

言

南齊書

王摛以博學見知於尚書令王儉儉嘗使賓客隸事多者賞之惟何憲爲勝賞以五花簞白團扇摛後至儉以所隸示之曰卿能奪之乎摛操筆便成文章旣奧辭亦華美乃抽簞取扇登車而去儉笑曰所謂大力者負之而趨

南史

劉杳博綜羣書沈約任昉以下每有遺忘皆訪問焉嘗於約坐語及犧尊約云鄭元謂爲畫鳳皇尾婆娑然今無復此器則不依古杳曰此言未可安古者樽彝皆刻木爲鳥獸鑿頂及背以出內酒



魏時魯郡地中得齊大夫子尾送女器有犧尊作犧牛形晉永嘉中青州賊發齊景公冢得二樽形亦爲牛象也約大以爲然又在任昉坐昉曰酒有千日醉當是虛言杳曰桂陽程鄉有千里酒飲之至家而醉亦其例昉驚曰吾自遺忘實不憶此杳曰出楊元鳳所撰置郡事昉卽檢楊記言皆不差

崔躋爲起居舍人從駕汾陽宮藍田令王曇於藍田山得一玉人長三尺四寸著大領衣冠幘奏之詔問羣臣莫有識者躋曰按漢文以前未有冠幘臣見魏盧元明撰嵩高山廟記云有神人以玉爲形像長數寸或出或隱出則令世延長臣敢稱慶因再拜從駕登太行山詔問何處有羊腸坂對曰按漢書地理志上黨壺關縣

有羊腸坂。帝曰：不是。又曰：皇甫士安撰地書云：太原北九十里，有羊腸坂。帝曰：是也。因謂牛弘曰：崔祖濬所謂聞一知二。隋書

唐太宗嘗出行，有司請載副書以從。上曰：不須。虞世南在行秘書也。潛確類書

劉敞使契丹，順州山中有異獸，如馬而食虎豹。契丹不能識，問敞曰：此駮也。爲說其音聲形狀，且誦山海經管子書曉之。契丹歎服。歐陽修每於書有疑，折簡來問，對其使揮筆答之。修服其博。宋史

蔡元定於書無所不讀，義理洞見大原，下至圖書禮樂制度，無不精妙。古書奇辭奧義，人所不能曉者，一過目輒解。朱熹嘗曰：人讀易書難，季通讀難書易。



黃伯思好古文奇字。洛下公卿家商周秦漢彝器款識。研究字畫。體製悉能辨正。是非道其本末。

侯均積學四十年。羣經百氏無不淹貫。旁通釋老外典。故其答諸生所問。窮索極探。如取諸篋笥。雖方言古語。世所未曉者。莫不隨問而答。世咸服其博聞。元史

曾魯博通古今。凡數千年國體人才制度沿革。無不能言者。以文學聞於時。淳安徐尊生嘗曰。南京有博學士二人。以筆爲舌者。宋景濂。以舌爲筆者。曾得之也。明史

陳濟讀書過目成誦。盡通經史百家之言。成祖詔修永樂大典。用大臣薦以布衣召爲都總裁。詞臣纂修者及太學儒生數千人。繙

秘庫書數百萬卷。浩無端倪。濟發凡起例。區分鉤考。秩然有法。執筆者有所疑。輒就濟質問。應口辨析。無滯書成。授右贊善。

楊慎在翰林時。武宗問欽天監及翰林星有注張。又作汪張。是何星也。衆不能對。慎曰。柳星也。歷舉周禮史記漢書以復。明世誦記之博著作之富。推慎爲第一。

唐順之於學無所不窺。自天文樂律地理兵法。弧矢勾股。王奇禽乙莫不究極原委。盡取古今載籍。剖裂補綴。區分部居。爲左右文。武儒稗六編。傳於世。學者不能測其奧也。

李維楨弱冠登朝。博聞強記。與同館許國齊名。館中爲之語曰。記不得問老許。做不得問小李。



鈔書

張儀蘇秦二人同志。遞剪髮以相活。或傭力寫書。行遇聖人之文。無題記。則以墨書於掌內。及股裏。夜還。更折竹寫之。拾遺記

余同時佐郎官。有梁子初。楊子林。好學。所寫萬卷。至於白首。桓譚新論

葛洪累遭火。典籍蕩盡。伐薪賣之。夜以寫書。家貧乏紙。所寫皆反。

覆有字。人少能讀者。抱朴子

闕澤好學。居貧無資。爲人傭書。以供紙筆。所寫既畢。誦讀亦遍。吳志

沈麟士篤學不倦。遭火燒書。麟士年過八十。鈔寫燈下。細書復成。

二三千卷。南齊書

袁峻家貧無書。每從人假借。必皆鈔寫。自課日五十紙。紙數不登。

則不休息

梁書

王筠自序云余少好鈔書老而彌篤幼年讀五經愛左氏春秋凡五鈔餘經及周官儀禮國語爾雅山海經本草並再鈔子史諸集並躬自鈔錄大小百餘卷不足傳之好事蓋以備遺忘而已南史衡陽王鈞手自細書五經置於巾箱中以備遺忘侍讀賀玠曰殿下家自有墳索何須細書別藏答曰巾箱中有五經於檢閱既易且一經手寫則永不忘諸王聞而爭效巾箱五經自此始

張文琮好自寫書筆不釋手子弟諫止曰吾好此不爲倦

唐書

柳仲郢嘗手鈔六經司馬遷班固范曄史皆一鈔魏晉及南北朝史再又類所鈔他書凡三十篇號柳氏自備旁錄仙佛書甚衆皆



楷小精真無行字

劉恕好學求書不遠數百里身就之讀且鈔殆忘寢食宋次道家多書恕枉道借覽次道日具饌爲主人禮恕曰此非吾所爲來也悉去之獨閉閣晝夜口誦手鈔畱旬日盡其書而去

宋史

劉崧家貧力學寒無鑪火手皸裂而鈔錄不輟

明史

張溥幼嗜學所讀書必手鈔鈔已朗誦一遍卽焚之又鈔如是者六七始已右手握管處指掌成繭冬日手皸日沃湯數次後名讀書之齋曰七錄以此也



穀玉類編卷二十四



||  
.  
.  
"



